

丹徒縣志撫餘卷二十一

雜綴三 紀聞

晉

荊州刺史殷仲堪布衣時在丹徒忽夢見一人自說已
是上虞人死亡浮喪飄流江中明日當至君有濟物
之仁豈能見移著高燥處則恩及枯骨矣殷明日與
諸人共江上看果見一棺逐水流下飄飄至殷坐處
令人牽取題如所夢即移著岡上醑以酒餽是夕又
夢此人來謝恩 晉陶潛搜神後記

太尉郗鑒字道徽鎮丹徒曾出獵時二月中蕨始生有
一甲士折食一莖即覺心中淡淡 或作潭潭 欲吐因歸乃

丹徒縣志撫餘

卷二十一 紀聞

一

成心腹疼痛經半年許忽大吐吐出一赤蛇長尺餘
尚活動搖乃掛著屋簷前汁稍稍出蛇漸焦小經一
宿視之乃是一莖蕨猶昔之所食病遂除差 同上

晉孝武太元年劉波字道則移居京口晝寢聞屏風外
悒咤聲聞屏風果見一狗蹲地而語語畢自去波隗
孫也後為前將軍敗見殺 宋劉敬叔異苑

劉宋

東莞劉穆之字道和小字道人世居京口隆安中鳳凰
集其庭相人韋藪謂之曰子必協贊大猷 同上

劉穆之東莞人世居京口初為琅邪府主簿嘗夢與武
帝泛海遇大風驚俯視船下見二白龍夾舡既而至

一山山峰聳秀意甚悅又嘗渡揚子江宿夢合兩船
爲舫上施華蓋儀飾甚盛以升天旣曉有一老姥問
曰君昨夜有佳夢否穆之乃具說之姥曰君必位居
端揆言訖不見後官至僕射丹陽尹以元功也 同上
有人姓劉在朱方人不得其語若與之言必遭禍難或
本身死疾惟一士謂無此理偶值人有屯塞耳劉聞
之忻然而往自說被謗君能見明答云此世人雷同
亦何足恤須臾火燎資蓄服玩蕩盡於是舉世號爲
劉鵠鵠脫遇諸塗皆閉車走馬掩目奔避劉亦杜門
自守歲時一出則人驚散過於見鬼 異苑

元嘉十九年長山留元寂曾捕得一狸剖腹復得一狸

丹徒縣志摭餘

卷二十一 紀聞

二

又破之更獲一狸方見五臟三狸雖相包懷而大小
不殊元寂不以爲恠以皮掛于屋後其夜有羣狸繞
之號呼失皮所在元寂家亦無他 異苑

東陽徐公居在長山下常登嶺見二人坐於山崖對飲
公索之二人乃與一杯公飲之遂醉後常不食亦不

飢 同上

元嘉九年二月二十四日長山張舒奄見一人著朱衣
平上幘手提青柄馬鞭云如汝可教便隨我去見素
絲繩繫長梯來下舒上梯乃造大城綺堂洞室地如
黃金有一人長大不巾幘獨坐絳紗帳中語舒曰主
者誤取汝賜汝秘術卜占勿貪錢賄舒亦不覺受之

同上

長山朱郭夫妻採藻澗濱見二銅釜沿流而下取之而歸有員蓋滿中銅器光輝曜日自然作聲郭懼運蓋北山埋之而後賣釜與人共載出為貨舡無故自覆失釜所在 同上

元嘉十九年京口霹靂殺人亦自題背 異苑

唐

唐時諺曰生東吳死丹徒謂吳多產可攝生自奉養丹徒土堅緊如葛可葬 欽定全唐詩註

唐末丹陽民常戲語曰待錢來待錢來後錢武肅授鎮帥潤州刺史遂據有錢塘乃其應也 同上

丹徒縣志摭餘 卷二十一 紀聞

三

李汧公任南海日於羅浮山得片石汧公子兵部員外郎約又於潤州海門山得雙峰石並為好事所寶悉

見傳授 歷代名畫記注

唐崔備壁書飛白蕭字記壁書蕭字者梁侍中蕭子雲之所飛白也韓晉公領浙西之歲得於建業佛寺置之南徐官舍函以屋壁俯瞰坐隅及晉公入贊廟暮啟于私第朱方官吏俟其代者完葺舊府圯墁故堂吏人以壁字昏蒙方以堊掃塗上時故殿中李侍御士舉為部從事以晉公翰墨代無等儔自護壁書施榻于下耽翫研味畧無已時士舉重焉給而方得及士舉府除職停寓壁字於小吏之舍至甲申歲士舉

爲江西從事通好江淮時李評事約盛閱圖書以示
寮友士舉方以壁字言於座中李君因而求之士舉
云得卿皇象羊欣蕭綸各一帖大鄭畫屏一扇卽輟
與之不爾當自持去李君富於圖書酷好遐異遂以
所求三帖并法士畫屏一扇易焉後十餘日壁書自
吳負來士舉於道病卒向若李君不閱雅跡士舉不
言此書卽壁字爲朽壤於小吏之家逸品絕前賢之
跡固知興亡繼絕後不乏人工極藝精中必有物加
以字子雲與國同姓所書蕭字圓卷側掠體法備焉
信眾賢之妙門實後代之茂範其飛白書起於蔡中
郎其後張敬禮王逸少子敬並稱妙絕子雲曲盡其

丹徒縣志摭餘

卷二十一 紀聞

四

法歐陽率更云蕭侍中飛白輕濃得中如蟬翼掩素
其爲前賢所重如此嗟乎景嶠此書今訪天下絕矣
惟此蕭字在乎舊都三百年間竟無類圯俾後之傳
授似陰有保持余與李君寓家南徐隣而友善獲觀
妙蹟感有將壞之壤晉公出之方絕之跡李君維之
用徵其事故以字志之

唐張彥遠
法書要錄

唐李約壁書飛白蕭字贊序梁侍中蕭子雲書祖述鍾
王備該眾體始變蔡張二王飛白古法妙絕冠時雖
名存傳記而迹絕簡素惟建業古壁餘此蕭字焉韓
晉公鑒古善書聞之嗟異遷之於南徐置于海榴堂
座右之壁

又獲齊竟陵王蕭子良龍爪書十五字置
于招隱寺以侍中之迹妙極故留以觀

余後獲之載以入洛書之故實事之本末中書舍人張公崔監察備撰記詳焉

同上

唐李德裕鎮浙西日於潤州建功德佛宇曰甘露寺當會昌廢毀之際奏請獨存因盡取管內廢寺中名賢畫壁置之甘露乃晉顧凱之戴安道宋謝靈運陸探微梁張僧繇隋展子虔唐韓幹吳道子畫

圖畫見聞誌

會昌五年武宗毀天下寺塔兩京各留三兩所故名畫在寺壁者唯存一二當時有好事或揭取陷於屋壁已前所記者存之蓋寡先是宰相李德裕鎮浙西創立甘露寺唯甘露不毀取管內諸寺畫壁置於寺內大約有顧愷之畫維摩詰在大殿外西壁

丹徒縣志據餘

卷二十一

紀聞

五

戴安道文殊在大殿外西壁

陸探微菩薩在殿後面

謝靈運菩薩六壁在天王堂外壁

張僧繇神在禪院三聖堂外壁

張僧繇菩薩十壁在大殿兩頭

張僧繇菩薩并神在文殊堂外壁

展子虔菩薩兩壁在大殿外

韓幹行道僧四壁在文殊堂內

陸曜行道僧四壁在文殊堂內前面

唐湊十善十惡在三門外兩頭

吳道子僧二軀在釋迦道場外壁

吳道子鬼神在僧迦和尙南外壁

王隋子須彌山海水在僧伽和尙外壁

顧畫維摩詰初置甘露寺中後

為盧尚書簡辭所取寶於家以匣之大中七年今上因訪宰臣此畫遂詔壽州刺史盧簡辭求以進賜之金帛以畫示百寮後收入內以上歷代名畫記

相傳云韓晉公滉在潤州夜與從事登萬歲樓飲酣置杯不悅語左右曰汝聽婦人哭乎當近何所對在某街詰朝命吏捕哭者訊之信宿獄不具吏懼罪守於屍側忽有大青蠅集其首因發髻驗之果婦私於隣醉其夫而釘殺之吏以為神吏問晉公晉公曰吾察其哭聲疾而不悼若強而懼者王充論衡云鄭子產晨出聞婦人之哭拊僕之手而聽有間使吏執而問

丹徒縣志摭餘

卷二十一

紀聞

六

之即手殺其夫異日其僕問曰夫子何以知之子產曰凡人於其所親愛知病而憂臨死而懼已死而哀今哭已死而懼知其姦也

西陽雜俎續集

宋

米老此銘不獨筆法超詣文亦清拔想揮毫時神游八

極眼空四海

後村題跋米元章焦山帖

李衛公鎮南徐甘露寺僧有戒行公贈以方竹杖出大宛國蓋公之所寶也及公再來問杖無恙否僧欣然曰已規圓而漆之矣公嗟惋彌日子近在沿江攝帥幕暇日與同僚遊甘露寺偶題近作小詞于壁間云樓橫北固盡日慼慼雨欸乃數聲歌但渺漠江山煙

樹寂寥風物三五過元宵尋柳眼覓花英春色知何處落梅嗚咽吹徹江城暮脈脈數飛鴻杳歸期東風凝佇長安不見烽起夕陽間魂欲斷酒初醒獨下危梯去其僧頑俗且曠愀然謂同官曰方泥得一堵好壁可惜寫了子知之戲曰近日和尚耳明否曰背聽如舊予曰恐賢眼目亦自來不認得物事壁間之題坊塲便是甘露寺祖風也聞者大咲

宋張表臣著
珊瑚鉤詩語

浮玉老師元公欲爲吾買田京口要與浮玉之田相近此意殆不可忘吾昔有詩云江山如此不歸山山神見怪驚我頑我謝江神豈得已有田不歸如江水今有田矣而不歸無乃食言於神也耶

東坡
題跋

丹徒縣志摭餘

卷二十一 紀聞

七

近世清臺占候頗失其守雖試選甚難多筌蹄之學以故證應之驗視前世爲疏開禧丙寅年二月丙子余在京口章以初居戎司薌風亭余蒞事庾中歸過之小酌握手庭下日方申忽覺天半砢訶有聲甚厲矯首正見一星南隊曳尾如帚逶迤久之始滅相與歎異未幾而兵釁開江淮薦饑死者幾半嘉定己巳五月辛亥余里居晚浴散步西圃暝色將至從行一僮忽仰而驚呼視之亦一星大小如京口所見而色紺青尾燄煜煜自南徂北行頗迅亦隱隱鳴於空中時虜酋易位蒙鞬闖其境兵禍糾結數年猶不解則所隊之方蓋有妖焉余不甚習變星二星所偶見皆白

畫出太史且未嘗問亦不聞奏報其它躔度微忒意
必不能詳也

岳珂
程史

徽宗靖康初南幸次京口駐蹕郡治外祖曾空青以荆
南轉運使來攝府事應辦忽宣至行宮上引至深邃
之所問勞勤渥命喬貴妃者出焉上回顧語喬曰汝
在京師每問曾三此卽是也特令汝一識耳蓋外祖
少年日喜作長短句多流入中禁故爾取七寶杯令
喬手擎滿酌并以杯賜之外祖拜貺而出明清少依
外氏寶杯猶及見之今不知流落何所

宋王明清
揮塵三錄

毛澤民受知曾文肅擢置館閣文肅南遷坐黨與得罪
流落久之蔡元度鎮潤州與澤民俱臨川王氏婿澤
民徒縣志摭餘

卷二十一 紀聞

八

民傾心事之惟謹一日家集觀池中鴛鴦元度席上
賦詩末句云莫學飢鷹飽便飛澤民卽席和以呈元
度曰貪戀恩波未肯飛元度夫人咲曰豈非適從曾
相公池中飛過來者耶澤民慚不能舉手

揮塵
後錄

建炎初高宗駐蹕維揚虜騎忽至六飛卽日南渡百僚
竄身楊子江津舟人乘時射利停橈水中每渡一人
必須金一兩然後登船是時葉宗諤爲將作監逃難
至江滸而實不攜一錢彷徨無措忽覩婦人於其側
美而豔語葉云事有適可者妾亦欲凌江有金釵二
隻各重一兩宜濟二人而涉水非女子所習公幸負
我以趨葉從之且舉二釵以示篙師首肯令前婦人

伏于葉之背而行甫扣舷舷失手婦人墜水而沒葉獨得逃生悵然以登南岸葉後以直龍圖閣帥建康其家影堂中設位云揚子江頭無姓名婦人豈鬼神託此以全其命乎 同上

曾文肅初與蔡元長兄弟皆臨川王氏之親黨後來位勢既隆遂爲仇敵崇寧初文肅爲元長攘其相位文肅以觀文守南徐時元度帥維揚赴鎮過郡元度開燕甚勤自爲口號云並居二府同事三朝悵契闊於當年喜逢迎於斯地又云對掌紫樞參大政同扶赫日上中天謬爲恭敬如是而中實不然已而興獄文

肅遂遷衡陽

揮塵餘話

丹徒縣志摭餘

卷二十一 紀聞

九

鄭德象滋晚守京口怠于爲政湯致遠鵬舉爲兩浙漕宣言俟應辦虜使至郡按治之時秦會之當國德象求援于秦蓋宣和初秦赴試南宮鄭爲參詳官其所取也至是湯別秦以行秦云鄭德象久不通問有少書信煩爲提攜面達因授之湯視緘題云稟目申呈判府顯學侍郎先生門下具位秦檜謹封湯得之幡然而改迺奏其治狀遂移帥江東 同上

咸淳癸酉十月李祥甫庭芝自江陵被召至京口一日午後忽見天裂見其中軍馬旗幟甚衆始紅旗繼而皆黑旗凡一茶頃乃合見者甚衆 宋周密癸辛雜識續集

梁棟字隆吉鎮江人登第嘗授尉與莫子山甚稔一日

偶有客訪子山留飲作菜元魚爲饌偶不及棟棟憾之遂告子山嘗作詩有譏訕語官捕子山入獄久之始得脫而歸未幾病死余嘗挽之云秦耶獄成盃酒裏烏台禍起一詩間紀其實也後十年棟之弟投茅山許宗師爲黃冠許待之厚旣而棟又欲挈妻孥而來許不從棟遂大罵之許不能堪遂告其曾作詩云浮雲暗不見青天指以爲罪於是捕至建康獄未幾病死此恢恢之明報也 同上

蘇長史者將卜居京口此宅素凶妻子諫止之蘇曰爾惡此宅吾必獨住始宿一夕有三十餘人皆長尺餘道士冠衣褐來謁蘇曰此吾等所居也君必速去不

丹徒縣志摭餘

卷二十一

紀聞

十

然禍及蘇怒持杖逐之皆走入宅後竹林中而沒卽掘其處獲白鼠三十餘頭皆殺之宅不復凶矣 稽神錄

潤州甘露寺張僧繇四菩薩長四尺一板長八尺許又陸探微神面黃口角露二齒向上金甲手持幡下一白獅子神彩驚人殿梁天監中蓋拱明間有二吳道子行腳僧吾移置行腳僧於淨名齋以避風雨已上並會昌中廢寺於本道合毀寺處移來於此寺其殿中置明皇銅像因得不廢元符末一旦爲火所焚六朝遺物掃地江左更無一晉筆藏經是六朝所書卷末晉王總持煬帝小字也隋平江南鳩集置寺題跋具存李衛公祠手植檜亦皆焚蕩寺後重重金碧參

差多景樓面山背江爲天下甲觀五城十二樓不過也今所存惟衛公鐵塔米老庵三間余作詩悼之云色改重重構春歸戶戶嵐槎浮龍委骨畫失獸遺耽神護衛公塔天留米老菴柏梁終厭勝會副越人談

米元章畫史

余游金山夜上寶公塔時天已昏黑而月猶未出聞風鈴鏗然有聲忽記杜少陵詩夜深殿突兀風動金琅璫恍然如已語也

宋周少隱竹坡詩話

余登多景樓南望丹徒有大白鳥飛近青林得句云白鳥過林分外明謝朓亦云黃鳥度青枝語巧而弱老

杜云白鳥去邊明語少而意廣

宋陳師道後山詩話

丹徒縣志摭餘

卷二十一 紀聞

十一

蘇子瞻書焦山綸長老壁一篇長於譬喻趙彥才云此篇譬喻乃坡公全用小說一段事裁以爲詩而意最高妙

三山志

焦山亦名浮玉漢末焦光隱處蒼翠匝巖谷深秀

鮑珍

雪泥鴻爪錄

潤之焦山有鸛巢於松者生三子一日鸛從外覓食有巨蛇長丈餘緣松巔入其巢而吞其子盡鸛歸知爲蛇也繞樹悲鳴三日乃去去之七日有僧坐殿側見鸛率羣雀至前後以十數皆繞殿飛一小鳥獨入殿中啾啾向梁間語梁間忽有巨蛇昂首直出將攫小鳥而墜之小鳥則忽近忽遠若相誘者蛇遂出半身

以攫鳥忽一鳥從佛後突出喙長利如錐霍然破其腹而去蓋先伏以伺者蛇遂腸裂墜殿前死鸛入殿翱翔不已羣雀皆噪久之乃散山僧異其事以語客客曰蛇所噬不知凡幾矣大鸛固食蛇者也飼之以子無可如何率羣雀以攻而復仇者乃得之小鳥也

異哉賀天士記孫洙異聞錄

京口居人晚出見江上石公山下有二青牛腹青背赤戲于水濱一白衣老翁長可三丈執鞭於其旁久之翁回顧見人即鞭二牛入水翁即跳躍而上倏忽漸長一舉足徑上石公山頂遂不復見宋徐茲稽神錄

戊子歲潤州有氣如虹五彩奪目有首如驢長數十丈丹徒縣志摭餘

卷二十一

紀聞

三

環廳事而立行三周而滅占者曰廳中將有哭聲然非州府之咎也頃之其國太后殂發喪於此堂同上

妙高臺壁間有坡公畫像初公族成都僧表祥按哲宗時人姓

蘇畫公像求贊公題云目若新生之犢心如不繫之

舟要問平生功業黃州惠州崖州周必大乾道庚寅奏事錄

蘇軾與常州蔣之奇聯名約卜居陽羨後謫黃移汝上章願得居常制可之乃往來於潤游焦山為綸長老賦詩書其壁而探撫三山奇勝之蹟多形之吟詠張萊

三山志

鎮江府黃山在鶴林寺之西南又一名峴山在黃山之東皆產石崇寧間米元章取小石為硯山甚奇特杜綰

雲林
石譜

作詩之妙實與景遇則語意自別古人模寫之真往往後人耳目所未及歷故未知其妙耳壬戌四月予過京口遇謝君植同登北固臨視大江風起浪來往來颿千百若凝立不動者因憶古人千颿來去風颿遠卻如閑之句誠佳語也

宋語溪吳師道著吳禮部詩話

丁巳同陳舅游甘露寺寺俯大江踞崇岡金山焦山皆在指掌東眺海門北見揚州天下絕致也李衛公在浙西再加繕葺有文饒畫像手植柏佛殿兩牖門菩薩六軀世傳僧繇筆菩薩二神一師子一世傳陸探微筆與予家所藏天王筆小異庭間有大鐵鑊僧堂

丹徒縣志

摭餘

卷二十一

紀聞

三

下有小鐵鑊鑊梁天監中所作砌下有石如蹲羊卽很石也世傳孫權劉備據此石以謀曹操前朝題記歷歷皆在主僧道敷頗淳固有理學題很石詩江北江南一道兵匆匆據石各論情功成與爾游滄海此語當初是至誠 是日同陳舅游延慶寺延慶寺卽劉裕故宅有丹井在焉壽邱形勢盤固真異境也乙丑晚離潤州趨金山寺自南岸登小舟風雨暴作大浪如屋出沒於其中比達寺下已見燈矣 丙寅大雨食罷登山頂江中風浪如萬馬齊奔寺在江心島上樓殿周帀可數百楹松竹疎翠望之如浮動南朝人謂之浮玉山其下卽水府也大浪春簸夜晴晝

雨初若不安東望海門焦山出沒皆在海中也主僧
了元者頗嫻外學文寶燦然圖畫尺牘玩好之物莫
不畢具又蓄孔雀能言之鳥數種因徧索古今題詠
了不可得惟於化城閣棟間揭介甫兄弟兩詩而已
又榜客位云官非文侍中才非李太白不請留題過
者莫不大罵真市塵之不若晚渡瓜洲夜泊運河旦
至舟次金山貽了元詩何年靈鷲鳥飛落大江心石
壁雖難轉風波不易禁樓臺分左右日月見浮沈便
欲歸休庇長嗟世累深宋張舜民
柳行錄

宋王莊定公存與刁經臣詩有二載京峴居過從不獲

屢之句注云京峴潤之二山世但以京峴爲一山嘉
定

丹徒縣志據餘

卷二十一 紀聞

西

鎮江又曾咬於鮑照陽春登京山行注京一作荆

非同上

唐成都府有散花樓河中有薰風樓綠莎廳揚州有賞

心亭按此揚州
指金陵鄭州有夕陽樓潤州有千巖樓皆見

於傳記今無復存者蓋或易其名或廢而不修也宋

并曲洧舊聞
又見退朝錄

近魏明帝時河東有焦生者裸而不衣處火不焦入水

不凍杜恕爲太守親目所見皆有實事張華博
物志

韓世忠傳世忠屯焦山謂兀朮至必登金山龍王廟觀

虛寶乃令百人伏廟中百人伏岸側果有五騎闖入

廟兵喜先鼓而出僅得二人逸其三中有一絳袍玉帶

既墜而馳者訪之卽兀朮也按金山在水中豈能騎而入復騎而逃此必誤也輿地紀勝謂伏兵北固山龍王廟此較近理乃宋史於此等處亦畧不訂正

陔餘叢考第十
三卷宋史三

宋初鎮江邵彪夢至冥府主者問曰汝知未及第之故

否對云不知遂引彪去見一鑊煮蛤蜊俱呼彪名彪懼合掌念阿彌陀佛蛤變黃雀飛去彪遂戒殺仕至

安撫使彌陀經
疏鈔

元

元劉善餘字有之鎮江人嘗寓宣城諸詞人雅相推重

甯國府志

丹徒縣志摭餘

卷二十一 紀聞

五

元李端鎮江人官御史出為甯國路榷茶提舉嘗日食

上書言臣下失職所致英宗曰是朕之過也又言朝

廷記注宜悉付史館從之後遷居於休甯

安徽通志流寓

右丞崔公仲文題金山詩浩浩長江天際來中流砥柱

獨崔巍風搖萬壑秋聲動潮捲千堆雪浪迴山勢參

差現靈鷲海波遼濶隔蓬萊夕陽不盡登臨意倒瀉

滄溟入酒杯元盛如梓庶齋老學叢談

東坡詩安得道人殷七七不論時節使花開按古今詩

話云韋七七每醉歌云解醞逡巡酒能開頃刻花又

詩史載韋七七事云七七有異術嘗與客飲云某有

藝成賓主歡卽顧屏上畫婦人曰可唱陽春曲婦人

應聲隨歌曰愁見唱陽春令人離腸結郎去未歸家
柳自飄香雪如此者十餘曲然則使花開者乃韋七
七非殷七七也東坡此詩誤以韋為殷耳不然二事

所載果有一誤也元李治敬齋古今註

按欽定全唐詩第十二函第七冊錄殷七七醉歌云琴彈碧玉調藥鍊白珠砂解醒頃刻酒能開非時花又錄陽春曲一首註其下曰七七有異術過潤州與客飲云某有一藝侑歡願屏上畫婦人曰可歌陽春曲婦人應聲而歌其音清亮似從屏中出據此當依詩史為殷七七無疑

郭昇元人字天錫京口人畫竹木窠石圖繪寶鑑郭天錫世家京口故其所畫全倣米南宮最為得法鐵網珊瑚

郭昇日記初十日登甘露寺見本長老留酒午麵仍求書放翁水調歌孫楚望摸魚子二詞於多景樓下壁

丹徒縣志摭餘卷二十一紀聞

六

上又以紙求書遺教經四十二章經瀉山警策證道歌十三日為甘露寺見本無傳長老鈔經客有惠杭州潘又新筆者書小楷數千而不伐可愛可愛同上

石巖元人字民瞻京口人官至縣尹書史會要朱德潤有題

石民瞻所畫山居圖詩存復齋詩

明

邃菴楊公本交趾人徙居湖廣復遷鎮江堂上署一聯云江漢有心皆戀闕乾坤無地不宜家初以神童應薦為翰林聲名籍甚凡從游者多進列卿相又陝西提學巡撫總制太宰入閣致仕又聯云四海儒紳多弟子三邊將領半牙兵此亦道其實非虛語也燕居筆記

明虞公諱謙號玉雪齋京口人永樂中官居都憲詩文政事爲羣公推讓公餘寫金錯刀竹多自題詩於上同里王性善精醫與公交厚善寫山水同時有郭將軍能詩工畫公贈詩有詩律清新畫入神之句其重之如此

圖繪寶鑑

杜堇字懼男別號檉居丹徒人舉進士不第遂絕意仕宦肆力古今自丘墳篆籀下至黃衣之錄靡不精曉詩文皆有古法尤善繪事山水人物咸臻妙境

顧炳畫譜

觀音閣下一石出水丈餘名善才石相傳云石下有老龍呼之即起

金山志

京口韓香除夜請客作桃符曰有客如擒虎無錢尋退

丹徒縣志摭餘

卷二十一 紀聞

七

之以其姓爲對也

陳鵠者舊續聞

靖康初王達可自翰苑出知鎮江吳元中與之詩云醉

中擲筆金鑿殿曉起鳴笳鐵甕城可謂壯語

同上

故刑部侍郎劉公諱伯芻爲學精博頗有風鑒較水之

與茶宜者凡七等揚子江南冷水第一淮水最下第七

嘗親挹而比之誠如其說及刺永嘉至嚴子瀨溪色

至清以煎佳茶不可名其鮮馥也又愈於南冷遠甚及

至永嘉取仙岩瀑布用之亦不下南冷

煎茶水記

楊慎嘗奉使過鎮江謁楊一清閱所藏書叩以疑義一

清皆成誦慎驚異益肆力古學

明史列傳藁

萬歷間京口張某早蜚文譽試七次不入泮禱文昌祠

夢帝君曰爾知罪乎試想十五年來豪富相延束脩殊厚爾所授不能償十之一凡歷五家皆爲改作文字誑其父兄誤其子弟天罰已至尙望入泮耶覺而自悔未幾以生徒賭鬪人命事株連訟庭刑辱貲竭悒悒死

感應篇註
證新編

萬曆十四年七月司馬汪伯玉在焦山延四方僧天界雲松棲霞素庵從實瓦官振軒玉軒主其事者焦山見源共二十四眾建水陸無遮道場有一詞客攜舊院妓徐翩翩拜佛伯玉作惠月天人品經門下士遂錄而梓之送板於徐姬家時丹陽姜公在禮書從徐姬家取版毀之更寄書司馬勸其用世不可作無益

丹徒縣志摭餘

卷二十一

紀聞

六

文章

周暉金陵瑣事

萬曆庚寅秋七月彰郡汪宗尼載女郎馬鳳笙來游焦山無何陳揚產程應衡茅溱繼至相與披草萊涉泥滓尋瘞鶴銘據石痛飲各賦一詩題壁而去汪宗尼詩云瘞鶴千古銘蒼苔迷古石髣髴龍蛇文乃雜鼉鼉跡陳揚產詩云褰裳尋鶴銘捫蘿覓棧石不見劊劊人空餘蚪蚪跡程應衡詩云殘碑旣剝落江澣雜亂石攀援歷潺湲欣然得遺跡茅溱詩云有鳥去不歸莫覩華表石誰爲千年人漫感千年跡馬鳳笙詩云漠漠江上雲纍纍水際石何意金粉姿覩此煙霞

跡同上

按楊鑄自春堂集有棧道崖觀女郎馬鳳笙題名詩

鎮江吳次垣觀察台朗言其鄉笄侍御重光世稱江上先生生平鐵面無私時權貴某公把持朝政其子爲江西監司倚父勢極貪墨聲名狼籍上官側目而無如何會先生巡按江西特具白簡劾之監司尋置於法而先生直聲傾動海內矣權貴慊之屢欲蹈先生隙以圖報復先生知難自存卽疏求罷歸隱居山中宦橐蕭然但以書畫自給四方不遠千里爭求恐後戶屢常滿先生藉以自娛不論潤筆之有無皆曲應其求無不滿意每歲筆耕有餘盡贖窮乏囊中不留一錢遠近頌聲不絕一日有客來謁廣顙環眼豐準

修髯年約四十許口操秦音自言耳名來求書畫先生異其狀以禮遇之留住三日客請問曰先生知予來意否曰不知曰先生真長者也予非他乃權貴某公使來甘心於先生者也先生笑曰老夫束髮讀書粗有所得壽夭窮通吉凶禍福一切且聽之於天今君旣爲某公所使遠來圖我此亦天命使然復何尤怨卽請速爲勾當了事無庸遊移濡滯也客笑曰子果欲不利於先生不待今日矣方予來時一路頌先生者甚夥及始至於境而頌者益眾老幼婦孺如出一口非大賢能若是乎若害大賢是悖天也害大賢不義悖天不祥不義不祥予不爲也今請爲先生賀

問何所賀曰此次幸使予來倘使他人則先生危矣
曰此後保無有繼君而來者乎曰先生請毋慮餘俱
予弟子行吾儕極重義氣予旣以義釋先生誰不知
者而肯爲某公用乎乃索所求書畫并解腰纏取兼
金一百陳几上揖曰先生以此自給淺淺不腆伏惟
笑納予自有以復某公先生請毋慮一拱手掉頭不
顧而去先生爲之爽然若失者數日

許奉恩
里乘

嚴懷伯思忠丹徒舉人官浙江有政聲同治己巳知嵗
縣事有盜夜入衙署殺一妾一女嚴覺呼從人聲未
已而刃割於胸矣天明盜仍踰墻出左提印右持刀
浴血行市中遂被獲問之曰只殺二心人問何以至
丹徒縣志摭餘

卷二十一 紀聞

三

此曰騎馬出入問何人指使曰數歲時有和尚教之
問其姓曰龐新昌人向以剃頭爲業間有何仇曰向
不認識亦無仇隙並拘內外廝僕訊問皆在夢寐中
不知其何以入何以出也事聞嚴

旨究追盡法懲治邑人思其遺政爲之服喪立廟以
祀嗣其同年某曰嚴少時從父徐州教官任署中有
狐薰穴得其一二殺之其父未之知也夜夢白髮老人
泣告曰公子殺吾愛女並妾誓必以報父興呼而責
之令跪讀一經越數日乘父公出復水灌火灼並獲
老狐殺以洩憤此事嚴亦向友人屢言之信不誣也

齊學裘見
聞隨筆

金山有義蜂冢鎮江府廨有蜂一筒逸出其王斃羣蜂相揉藉爭死之不下萬餘嘉靖中鎮江嚴同知者爲立義蜂冢徐尙書養齋問作蜂冢歌紀事云羣蜂勢方屯主蜂自殘折意氣許與成君臣義心欲奮秋陽烈摧軀抉股同死君田橫門客多如雲後人重死不重義奉頭鼠竄何紛紛微蟲感恩乃至爾吁嗟萬靈不如此金山山高江水寒孤冢蒼茫爲誰起西園雜記云嚴名應階綠雪堂雜言云在北固山楊邃庵閣老表爲義蜂冢

王士正池北偶談

按立位字古通用周禮小宗伯掌建邦之神位注故書作立鄭司農云立讀爲位古文春秋經公卽位爲公

丹徒縣志據餘

卷二十一紀聞

三

卽立焦山鼎銘僉立中庭亦位字也

陸繼輅合肥學舍札記

道光二十二年六月初七日暎夷兵船闖入圖山關將犯揚州周子瑜觀察札委餘東場鹽大使顏柳橋

名崇

禮一字養怡

馳往招撫顏有膽略素善任事遂與辦事商人包恪莊計議稟商但雲湖都轉許卽相機辦理顏

卽於初八日隨帶羊酒雞豚等物赴瓜洲渡江至象山繹道瞭望值夷船飛帆駛進勢甚兇猛象山與焦山緊對顏伺其抵焦山碼頭以禮招呼效鄭商人弦高故事額手舉說帖獻江干因得上夷船見其頭目郭士利引與郭酋相見詞色慷慨曉以敬天心保民命諸語郭漫應之次日復帶金幣等物以婉詞導之

時夷人已將瓜洲民房佔踞並徧樹赤幟將江路全
行堵截無一民船往來而火輪船及三板船已有七
八十隻盡攔入金山北固之麓顏探聞郭酋主戰嘖
酋主和正在設法謀見嘖酋而鎮江已破傳聞駐防
海都統閉城錮民盡遭屠戮顏心膽俱碎卽欲爲脫
身計而包以揚城危在旦夕慙慙之顏亦以揚州若
失則夷船必瀆江而上金陵皖江一帶俱不可問遂
激於義憤幡然復出因嗎利遜見嘖酋嗎能通漢語
顏曉以戰爭之害和議之利轉述之於嘖酋始有獻
銀百萬不入揚城之議歸復於包包爲轉請於都轉
時城中人人危懼移徙者十之七八顏復上夷船囑
丹徒縣志據餘

卷二十一 紀聞

三

嗎酋與嘖酋允爲減銀往復數四議定給洋五十萬
元每元作銀七錢一分遂面與嘖酋定約旋即分次
送給而揚城安保無恙居民亦旋定安輯矣余初聞
顏柳橋之名住揚州半載未見其人故無由詳其通
款之事後徧詢同人得包松溪程柏華所述其膽略
識力頗有過人處柏華復囑顏來謁因悉其顛末而
敘次之如此是役固由但雲湖都轉周子瑜觀察之
主持而顏與包之功亦不可沒也包現爲總商家門
鼎盛顏亦得運同銜其子某孝廉且以郡守候選矣

梁章鉅浪跡叢談卷二 綬按上江江寧兩
縣志誤顏公爲洋商而未知其爲鹽商也

瘞鶴銘舊傳陶貞白書或曰顧況或曰唐王瓚凡三說

程嗣章据陸魯望寄皮襲美有上皇山樵之稱定爲皮日休因据日休詩卻向人間葬令威爲瘞鶴之證龜蒙詩更向芝田爲乞銘爲撰銘之證較劉無言之說近理矣劉說見東觀餘論唯於逸少二字既言董黃陶所

錄原文本無乃玉烟堂增入又言襲美以已字逸少而假右軍之名則自相矛盾金鰲金陵待徵錄

其立石有峯嶽徽士丹陽外仙尉江陰真宰峯字偏小疑是蓬字之缺潘岳滄海賦其中有蓬萊者嶽青邱奇山蓬嶽仙真所居故取以爲名也丹楊郡漢治宛陵晉治秣陵以山多赤柳得稱史遷年表亦作楊字若今之丹楊故雲陽縣唐天寶初始號丹陽觀此亦丹徒縣志據餘

卷二十一 紀聞

可知爲唐以前人所書也吳錫麟游焦山記論瘞鶴銘

陶隱君書奇特世傳畫板帖及焦山下瘞鶴銘皆其遺

跡李石續博物志卷八

閱喬督部松年蘿蘿亭札記有云近人李君言鶴銘是

陶隱居撰弟子孫文昭書見寶刻叢編喬公云近吳

子苾學士刻叢編闕揚州一卷譚復堂日記

京口周千秋在樞曹月索長安米米蟲糾結一簸揚落地則羣蟻嘜之無何雞至則蟲與蟻俱葬雞口其妻沈氏憐之令奴子每將簸揚置席於地事訖即聚蟲貯甕併貯糟糠爲蟲之糧謂可緩其死乃至秋皆羽化而去一日沈夫人消渴病甚醫皆袖手千秋因以

此事慰之曰豈有生百萬命而自夭折者後病漸愈且更生子焉

好生合編

鎮江衛軍范某妻患癆病將死遇道人與一藥方用雀一百喂以藥米至三七日取腦服之范果依方買雀其妻嘆曰以我一人害雀百命甯死不爲開籠盡放之已而其病自愈是年有孕生男兩臂上有黑點如雀形蓋陰府以此顯好生之報也

好生合編

鎮江蕙某暴死冥王曰汝父子好食牛罪惡深重當受地獄百千苦報汝壽未終合先受責遂命鬼卒將蕙雙眼取出鞭之數十汝今世無大惡尚有廿年陽壽但汝父罪重汝歸語之急戒牛肉蕙醒雙眼痛不可

丹徒縣志摭餘

卷二十一 紀聞

三

忍兩腿亦腫因述以戒人

好生合編

伊成阿能詩著晏如草堂詩集一卷

京口入旗志

達春佈漢姓石字客山詩近中晚唐如賣菊句云風雨一肩秋又客至句云野蔬供客鉏諸葛村酒呼童買百花皆可誦著客山詩存一卷亦善清文江蘇學院王以銜延請教讀伊壻吳振棫清文後振棫由清書翰林官至四川總督

同上

清瑞字霽山正白旗人廩生漢姓艾好古能詩往往自出新意如京口竹枝詞云城頭看厭真山好對岸河泥看假山金陵懷古句云英雄兒女千秋淚聚作秦淮向客流皆眼前語而情韻特佳咸豐癸丑後感時

記事尤見情詞沈鬱年七十餘重遊泮水著江土草堂詩集一卷子文興需次通判同

佈彥原名佈彥泰漢姓劉字子交一字泰如庚子科進士戶部雲南司主事工詩著聽秋閣詩鈔一卷如京口懷古句云山氣不隨兵氣黯濤聲猶挾鼓聲流又古硯句云有淚自傷懷寶久成材豈畏受磨多同

燮清漢姓項字秋澄正黃旗人附生軍功保舉知縣工書畫善琴碁尤好吟詩如和魁軍憲大觀亭句云江山留客醉風月笑人忙又竹林寺句云流泉通祕竈落葉打禪牀又夜行句云霜深泥路滑月皎夜江清又題武侯小像句云名士胸襟仙佛慧英雄志氣聖

丹徒縣志

卷二十一 紀聞

三五

賢心又春風句云捲殘楊柳煙千里剪破桃花浪一江一時咸傳誦之著養拙山房詩鈔一卷同

陳迦陵維崧少有文名數奇落魄年四十餘尙困諸生一日過京口有相士熟視良久曰君五十後當入翰林然不由科甲人皆嗤以爲妄宣城梅杓司贈詩云朝來日者橋邊過見說功名似馬周後果以薦舉鴻

博授檢討

余金熙朝新語

國朝張玉書官大學士游黃山寓居太平訪同年友杜瑜周光咸之後索黃太松所畫黃山圖歸以當臥游

甯國府志

國朝王之智丹徒人寓居五河其孫民皞中乾隆壬子

副榜 五河縣志

國朝于宗林字子道丹徒人少隨父游學於五河嘉慶

丙辰舉孝廉方正以親老不赴家居侍養著有四箴

齋文集 五河縣志

許躍鯉字春池桐城進士江蘇府教授課士有方嘉慶

乙丑捐辦平糶丁卯倡創鎮江試院著有五經一得

並四書一得春池文集詩集兩窗夜話 桐城縣志

宣和畫譜載巨然煙浮遠岫圖六余見一二幅皆非真

蹟惟觀沈石田王員照王石谷諸人臨本耳京口張

寶崖家藏巨然寒巖飛瀑圖立軸董文敏題畫法與

賺蘭亭相似筆意渾厚梅道人石田所從出也本培

丹徒縣志 卷二十一 紀聞 三

風閣物張則之題數字於下乾隆末畢澗飛曾屬余

以八百金求之不售 吳修青霞館論畫一百首註

王叔明南村草堂圖卷在海昌蔣氏向藏余家余得之

京江郭氏紙本設色林木蒼翳峯巒迴合草堂出於

林表極村居深邃之概後有孫作王掖胡儼金聲四

人手書傳記序跋張青父識其尾載清河書畫舫王

夢樓題卷首 同上

丁南羽海嶽菴圖余得於揚州肆間今藏海昌蔣氏天

下第一江山六字吳雲壑擘窠書刻石北固山上今

寶晉書院即海嶽樓故址也南宮小像及研山圖石

刻尚存 同上

宋真宗詔封焦隱士時金銀玉佛各一尊與詔書下其

原勅與玉彌勒佛今存

陳仁錫焦山記蹟

府志

明武帝時楊文襄公一清為僧妙福留玉帶鎮山神宗

時內宮監黨存仁欽差清理蘆田掌南京內府供用

庫印事亦嘗以玉帶留焦山

焦山志畧

宗室寶竹坡侍郎

廷

同治癸酉游焦山戲做坡公故事

留黃帶贈芥航上人得截句書以畀之詩曰金帶郵

堪希玉帶竹坡安敢學東坡儂家自有脫胎法好古

休嗤落臼窠光緒壬午再游焦山復見此帶又得截

句以博芥航一笑未知今身還能與帶相見否詩曰

做舊來焦麓匆匆打槳還自慚人遜帶不得久留山

丹徒縣志摭餘

卷二十一 紀聞

三

張文襄公之洞亦有觀竹坡留帶詩三首

焦山續志

東人詩話云崔文昌侯致遠入唐登第以文章著名題

潤州慈和寺有畫角聲中朝暮浪青山影裏古今人

之句後雞林價客入唐購詩有以此句書示者

日本上毛

河世寧著全唐詩逸按崔致遠高麗人

嚴問樵太史

保庸

丹徒人道光九年庶常改知縣太史

負才瑰異兼擅書畫能自度所製曲改官後鬱鬱不

稱意恥為斗米折腰尋以病去放浪江湖間雖抑塞

窮愁而豪氣不減壬子三月道出廣陵太史招予及

錢筱南作餞春之會自江上有警不知所往而筱南

亦下世矣思之黯然

海鹽黃燮清國朝詞綜續編

咸豐九年己未六月刊亡友嚴問樵保庸太史詩詞告

成七月初八日夜余夢至一處精舍數間亭臺花木

甚盛與問樵暢敘別悰問其生辰答曰余年八月十

三日寅時是耶非耶亦一奇也余題問樵遺稿四律

詩曰意氣自千古交游近十年問樵贈余楹帖云知君意氣自千古與我

交游近十年思君不可見灑淚校遺編吳苑花長好揚州

月不圓魂兮何處至昨夢語便便飄泊江湖際長年

醉不醒詩情追李白酒德頌劉伶宦興淡於水桃花

紅滿庭風流猶未歇忽隕少微星骨相孤高極吏難

強項為逢人多傲兀與我最相知共有煙霞癖從無

軒冕思斯人不世出誰識虎頭癡妙語猶在耳思之

丹徒縣志摭餘 卷二十一 紀聞

三

涕自潛昔年余刻先集告成問樵對余曰一件好事一個傳人都被癡伯做成了令人聞言感深

以半生事剗剗方寸得安閒今日遂君願在天應解

顏寄言同志者珍重藏名山齊學裘見聞隨筆

北固山甘露寺有銅鐘一口元至正九年所鑄周遭刻

心經一部下方刻鎮江路達魯花赤馬速忽鎮江路

總管李世安鎮江路上萬戶府達魯花赤永安名攷

鎮江府志題名失花馬速忽永安二人又誤以世安

為達魯花赤不知世安漢人不當為達魯花赤也錢

所上駕齋養新錄

桂花叢談記李衛公以方竹杖贈甘露寺僧云此竹出

大宛國堅實而正方節眼鬚牙四面對出云云按方

竹今閩粵多有不爲異物大宛卽今哈薩克已隸職
方其地從不產竹烏所謂方哉小說附會之詞也

紀昀

閱微草堂筆記

嚴麗生學塗詩學盛唐尤工樂府句如山作興衰色江
流今古聲雲如追鳥去江欲帶山行山好應搜誰是
賊石奇當拜我非顛急浪爭驅疑水鬪亂峰飛舞訝
山忙皆警句也

挹翠樓詩話

錢伯調之鼎有三山草堂集贈吳文溥云蠻風瘴雨黯
羣山仗劍親從幕府還馬上功名詩卷在天涯歌哭
鬢毛斑箭飛霹靂驚銅柱酒傍琵琶憶玉關我亦江
湖愁落魄蒼涼同訴夕陽間此與曼生雲伯所贈可

丹徒縣志摭餘

卷二十一 紀聞

三

稱鼎足

同上

鮑野雲文達明經著野雲詩鈔句如枯松臥波面危石
閣山腰山光經雨落空翠天影入江生淺藍秋歸落
葉吟邊樹人渡斜陽雨外天江聲夜動千山雨海氣
朝涵萬井烟村落炊烟深出樹市橋燈火遠藏樓品
格在謝四溟梁蘭汀之間

同上

李琴夫御有丁香集七十餘首工於發端送金兆燕下
第南歸云零落亦君恩歸來吾道存千金懷寶劍一
笑返江村歌濯滄浪水歡追老瓦盆殷勤謝朋好莫
扣富翁門贈衛三德威云衛三慷慨佩吳鉤一旅偏
能據上游意氣指揮四公子才名傾動五諸侯閉門

風雨生香草落日關山感敝裘我亦江東舊詞客對君不敢賦登樓同上

王柳村豫諸生著有種竹軒詩文集由竹林至鶴林云閒雲飛碧岫策杖共幽尋忽入萬重翠不知流水深暮烟低宿鳥春雨洗高林一徑策衣上松鳴衆壑音疏澹頗近常盱眙同上

彭望祖名遠江西人幼端方沈靜寡言笑弱冠舉諸生從師讀書西山草庵中冬月有道士衣單麻衣冒大雪來求宿忽病足不能起望祖憐之日分飲食奉之三年道士足愈起謝曰吾受郎君惠厚矣無以報出丹書三卷授之曰讀之可證神仙遂去不復見望祖

丹徒縣志摭餘

卷二十一 紀聞

得其書熟讀之明亡棄舉子業來遊江南順治中京口明經張行貞延爲孺子句讀師賓主甚相歡他日飲青梅下行貞盛言閩粵鮮荔之美恨不得啖望祖曰是固無難致也行貞曰噫先生何云不難哉固無論山川險阻第相去數千里即使策駿馬乘傳日夜兼程行至此亦槁矣望祖唯唯抵暮行貞入望祖命童子灑掃書舍庀香具法壇戒童子先寢童子慧怪之假寐竊起窺望祖於篋中取草龍一具祭於壇須臾龍忽蠕然鱗甲爪牙皆動望祖乘之騰去不半夜歸矣龍兩角掛纍纍皆鮮荔也乃撤壇收草龍置篋中而東方已白呼童子起進之行貞大駭詰童子童

子具以告於是行貞知望祖有神術謹事之歲餘望祖忽于午夜出草龍收行旅琴劍書篋掛于上乘之而去不知所終

虞初新志

謝振定字一之號薌泉湖南湘鄉人乾隆末官御史直

聲振天下戊申江南鄉試旋巡視南漕入瓜儀糧艘

阻風禱於神得濟疏建風神廟嗣是渡江風輒順京

口人呼謝公風

先正事略

張明府贊皇解組卜宅於綠水橋傍構小閣取斜川松

菊猶存意顏曰松存講學其中自持巖峻負笈者甚

眾與紫芝明府並號經師

惜陰筆記

道光壬寅五月英人要盟船入長江江陰鵝鼻嘴為最

丹徒縣志據餘

卷二十一 紀聞

扼要處徐州總兵鎮江參將帶兵駐守監司周頊勸

輸十萬鳩工堵塞聯木為梁伐樹沈水復集鎮江衛

減運糧艘五十束油帶於上為縱火計副都統海凌

所統兵弁不令出城由青州調來旗兵四百名本駐

東馬頭礮臺亦調入城月杪參贊齊慎兵二千來援

湖北提標兵二千先至制府牛鑑牒謂西兵已往山

東因移防初六制府至示意富民令輸金萬犒西師

俾不登岸初八開城兩時許初九西門賂開片刻初

十行城下者胥鳥槍擊斃疑為漢奸也捉人送令錢

燕桂訊釋即指令亦漢奸乘其出城不納十一早大

帆出女牆丈許煙氣騰騰火輪三板等船已向甘露

港西津渡進泊十二城中飢民無處市米監生吳學增家米四百餘石貯西城外呈守運入安民守請副都統不開城其日每日尙開西小門進兵米十四已刻英人登岸參贊提督兵退英人攻北城放礮六府署後雉堞轟塌適城隅有繩梯一係防兵縋人出忘撤者英人卽攀援而上止城樓青州兵與巷戰西兵被殺數百人青州兵亦死二百餘副都統乘籃輿至南城知府請開城放難民不允以槍擊眾知府憤赴縣學自經一李姓解下負入舟復蘇婦女屍滿道上英提督郭居府署遣兵守四門每早一礮每早晚必鼓吹俱在府署前鼓樓上十七英提督出示禁劫掠

劫掠如故土匪蜂起西門無日不火英人縛十五人於樹鞭背流血縱火如故有一諸生赴府署上書爲所擯又有諸生二十餘人與牒乞充里長英提督坐鼓樓下親給執照分持而去無非欲借其勢以保身家耳廿一薄晚府前發鼓數通奏西樂徹夜黎明鼓吹前導英提督坐知府乘輿出城上船去留總兵叔得駐北固山亦出示禁土匪北城已被築斷直達甘露港全無阻礙西兵仍不時往來城中然其船已多往江甯留京口者僅數艘初大觀樓爲青州兵所駐僧某隊長留之仍住持如故六月十三侵晨急呼僧曰都統欲使青州兵前導殿以本營兵遇人卽殺逐

戶誅夷止留旂兵方保無虞我不忍汝死繼汝出僧
與北固僧善往語之故且趨之行時英船多泊北固
山下語爲一通事所聞轉告兵目兵目曰我待和議
耳本無意破城是反害百姓矣故十四日攻城破之
和議旣成英兵官囑原任大學士伊里布在所議銀
數內留一百五十萬撫卹難民且張示四門曉諭焉
海都統家屬避居金壇遣家丁至丹陽報自盡令不
受牒回金壇令文川受牒轉報大府兩翼協領亦報
海全家殉節大府據以入告御史黃宗漢彈海凌誣
殺良民報死不實 命督臣查覆丹徒士民顏崇禮
郭湘等十六人具狀言海凌夫婦實是在署內焚死

解字與骸骨雖燼而所著葛紗袍及所戴玉耳環尙
未全燬據此復奏 賜卹如故十一月初海凌夫婦
柩由金壇行抵京口當英人之旣入城也令居民送
牛羊等物至府署牛一給番銀八他物價無定每日
兩飯皆在府學大成殿據案食執爨卽在其間寺觀
中所塑像或剖面或穴背尤好割取鬚髯甘露寺十
八應真盡仆於地以支床二十二日英提督往江甯
所留兵日日捉數千人拉甘露寺鐵塔厯久不動乃
止七月初參贊大臣耆英乍浦都統前大學士伊里
布至江甯議和伊家人張喜亦自都中來共議時英
提督船泊觀音門外議與番銀二千一百萬先交六

百萬餘三年分給並與通市馬頭廣州福州廈門甯波上海奏明罷兵九月初一方退出圖山圍城記

道光壬寅六月十三未刻兵目數人登北固山若好以暇者山在府署後里許署以城為垣踞高岡巖疆隱隱望之卻步惟登此山則城門瞭如指掌去冬擬以青州兵屯其上都統於今春忽悉調入城不知其何見而然也此時沿江隘阻彼雖已據尚不應於此從容四顧貌我藩籬何則署後與山寺平對林臯駢翳藏巨礮設窺準發之寺中人物俱碎乃彼甫登岸城內外三大帥兵五六千皆作壁上觀止知擁兵自衛耳隱園居士京口僨城記

丹徒縣志據餘

卷二十一 紀聞

三

失名詩冊中有集北固次小癡韻詩祇一頁有謂蘭舫先生詩集梓行語蓋郡人也尋又檢得三頁有和松溪太守山寺詩三首焦山寺頸聯云鼎應神擁護碑認鶴歸來北固詩腹聯云地壯南徐險雄屯北府兵他如簾波云青浮草色侵三面紅暈花光旋一渦燈影云半夜書聲和雁陣一星篝火掛魚簪幽光集

道光二十九年大水趙子舟在寺籌賑款戴善之感聞異香賑外集五千金修大殿殿後建佛堂五楹殿傍建畫材閣三楹諸佛裝金塑十八羅漢並四天王像招周氏老僕看守僕隨披雍咸豐元年告成至二年有米客來遊老僕獻茶殷勤客與一物曰遇難可出

此回龍庵尼亦然明年楮逆至急出所與物故石帆樓回龍庵獲存僕名守忠

石公渡野人日記

同治七年正月十五聞衛公塢有人扒至頂抱久不敢下聚觀者多人忽又傳言尖爲人竊去夜中果失羣謂主火主水主文風主洲埤不一顧蘇人言往年江北塔頂失是年遭水安兒亦言前年興化塔頂落夏秋遭水十六遙望之果禿

同上

光緒十二年七月初二未後雨中一霹靂初三朱景荀言雷時北固鐵塔折去四層地下落有鐵皮胆木尙存二十步往木已爲人取去祇餘塔二層底一層塔下倒臥第四第五二層八面四門題名幾滿其無字

丹徒縣志摭餘

卷二十一 紀聞

三五

一層每面五佛一排各三排折卻在中層半面座折向東外欹處蓋胆木力不勝也登凌雲亭望江五州直瀉瓜洲一折又直瀉金山一折銀山直瀉焦山一折又直瀉汝山一折下則一折至圖山回由龍垸出外城

同上

郡人魯榕臯言有吳姓題寶晉書院壁云千里征塵滯馬蹄天涯誰借一枝栖窮途骨肉蕭郎僕冷眼功名季子妻鄉信久疏頻問雁中年多感怕聞雞世情淡薄非如舊三尺吳鈎手自提聞吳行止頗不檢而詩

自不羈

北固山志

光緒壬辰前署道台錢君研觀察以山西岸埤將壞民

居商之道台黃幼農觀察上海道台聶仲芳觀察施少欽封翁集資囑陳寅谷廣文董其役在新河街口設浮挑溜壩以衛之又因沿江新城已坍入江南岸皆成溜窩深不能下錨泊舟就古荷花塘浚深拓開作東西兩塢以便收泊既成又自東塢開一河以通甘露港溜挑坍止居民安枕遇風入塢行船賴安上同光緒庚寅甘露寺廊東山巔掘土七尺餘得宋府城磚

甚多有紀政和年者

按山後亭北有甘露門史彌堅立磚出後陳任賜拓二磚於扇

一府城磚三字一丹佐二字贈周伯義並跋云光緒庚寅在北固巔督工掘土七尺餘所得云又按潤州於政和三年始升府唐韓滉傳築石頭五城自京口至玉山皆土為之是於升府後易土為磚也北固山志僅載史彌堅復修史仕嘉定朝在政和後大約此磚未

丹徒縣志摭餘

卷二十一 紀聞

三

出故未深考此跋是府城確據因亟補載

壬子夏築馬路開大市口路心石得古磚一方上刻字

云洪壽徐琬募眾緣重新砌換大市心石并砌南街

十餘丈所用五萬餘錢時崇寧四年乙酉歲九月二

十七日記

邑人陳慶年撫拓跋云壬子季夏吾邑

及崇寧錢在焉崇寧乙酉募眾緣之所記也彼時砌換心石并修南街路十餘丈耳用錢又祇五萬餘事非重要而洪徐二君所以示久遠者如此為可深念也吾郡當宋之南渡兵火之餘有石一株在瓦礫中上有刻字云有唐上元甲子歲穎川陳良參叨尹延陵獲此石墨莊漫錄嘗記其事謂唐上元甲子距今紹興上元甲子三百六十年信乎金石之壽今此磚之出距崇寧乙酉八百有十一年矣而書刻完好可淪沒者固深覺其足玩也

案考杜佑通典京口有譙山戍太平寰宇記亦以譙山

爲戍海口之山是北宋以前尚名譙山北宋以後始以焦孝然事傳會之孝然避兵娶婦於揚州見三國志注爾時孝然年尙幼並無隱譙山三詔之事且孝然爲魏以後人蔡伯喈卒於漢末在孝然之前焦君之贊當別有一焦君斷無爲孝然作贊之事又焦山古鼎王西樵始據韓吏部如石言爲京口某公家物嚴分宜奪之康熙間人競以爲詩歌故實然自嘉靖以後明人詩集從無此說某公究何公耶然則爲如石臆說耳天水冰山錄於分宜家物無所不載古銅鼎器款中祇有古銅鼎二箇共重一百一十四斤並未言及款字且鼎甚重大非今周鼎明矣朱竹垞翁

丹徒縣志摭餘

卷二十一

紀聞

三

覃溪二君深於攷古者其焦山鼎詩中皆不言此事爲其無據也

阮元焦山采畧

又按焦山舊志云焦山有周鼎大逾斗古色陸離傳於吾鄉魏氏分宜相嚴嵩當國以不得此鼎將罪之嵩敗魏氏懼子孫終不保送焦山嘉靖間倭亂藏某宦家兵退云質多金不復歸之山中又按此志康熙年間協紳士措金半百贖之還山中又按此志康熙年間僧行載所輯傅澤洪作傳與二王蓋同時王西樵所云某公蓋魏氏也但據此鼎亦未嘗入嚴氏鼎自從魏氏家入焦山也惜志不詳所自出亦未可深據然自足證西樵之非

同上

康熙甲戌科丹徒裴公之仙僭數友人入都會試都中有善召此者延之問中否仙至判一貴字眾不解再叩之則曰皆判明矣榜發後惟裴公中會元餘皆落第裴公眇一目始悟向所判貴字乃中一目人也袁新齋諧

焦五斗丹徒人孝然裔孫嘗作焦山志忽失去其子復得之於郡城骨董鋪中公按盧雅由是修金焦二山

志李斗揚州畫舫錄按吳清鵬有汪巢林先生乞水圖詩云平生冷淡性乞水固所宜南鄰亦解事

與分雪一瓷註云鄰人焦五斗亦雅士性好蓄雪水詩見吳氏一家稿清鵬為穀人祭酒子嘗寓揚州可見焦與名流投贈矣

地名金山者非止吾京口浮玉峰也洪容齋云英州之

丹徒縣志摭餘

卷二十一 紀聞

北三十里有金山寺予嘗過其處見法堂題兩絕句僧云廣州鈴轄俞似之妻趙夫人所書詩句灑落不凡而字畫徑四寸適健類薛稷數年後又過之僧空無人壁亦墮圯猶能追憶其語其一云莫遣鞦韆飽一呼將軍誰志滅匈奴年來萬事灰人意只有看山眼不枯其二云轉食膠膠擾擾間林泉高步未容攀興來尚有平生履管領東南到處山蓋俞似所作也此金山與京口迥乎不同今丹徒邑志見有金山寺三字硬將第二首列入紀聞中且誤為趙夫人作光緒年間重修秉筆者竟未能刪特附於此以詒將來

訥齋
隨筆

法海洞在京口金山余臆其爲裴頭陀棲隱處也然法海之名見於稗說婦孺皆知丹徒縣志及金山諸志方外一門獨佚其人余攷法海金陵人見顏魯公湖州烏程縣杼山妙喜碑又楊秉杞雜錄云繆雪莊謨有題法海禪師像詩同上

吾邑城南距城二十餘里有東溝村村中多神姓居此已二十世蓋自元代卽遷此而姓氏譜不載初疑爲蒙古後如江陰是氏如臯冒氏旣考其族人知爲神農氏裔榆罔失帝位子孫遂以神爲姓漢初有騎都尉神曜居瑯琊至中郎將神通遷韶州宋有神應龍登開寶間進士神潛登元符三年進士神元奎官廣

丹徒縣志摭餘

卷二十一

紀聞

三

陵太守神祿官開封府尹神軾官浙江道明有涇陽伯神英天順正德間官右都督鎮守大同甯夏等處自壽州遷陝西明史列傳神太乙元時人宦游京口因家於吾邑入國朝神子誠名而明雍乾間官湖廣游擊是神固古姓也而姓氏譜佚之疏矣爰詳識之俾他日考古者之證也

臆齋隨筆

成功聞王師三路攻永麻於雲貴乃大舉內犯江南圖牽制十六年六月由崇明入江時蘇松提督駐松江江寧提督駐福山分守要害圖山及譚家洲皆設大砲金焦二山皆鐵鎖橫江煌言屢卻不前令人泗水斷鐵索遂乘風潮以十七舟徑進沿江木城俱潰

破瓜洲獲提督管效忠圍鎮江五路壘壘而陣周麾
傳礮聲沸江水攻北固山士卒皆下馬死戰官兵退
入城成功逐之而入遂陷鎮江屬邑皆下部將甘輝
請取揚州斷山東之師據京口斷兩浙之漕嚴扼咽
喉號召各郡南畿可不戰自困成功不聽

魏源
聖武記

洋船退出吳淞口圖入長江初裕謙奏江海情形有長
江無遮障潮來甚溜甚難防守之語牛鑑則駁斥常
鎮道請守鴉鼻嘴之稟且徧諭居民以長江沙綫曲
折洋船斷不能入賊劫沙船導火輪船兩次駛探初
報諸險要皆無備次報諸汊港荻港皆無伏始連檣
深入六月八日薄瓜洲瓜洲城已空遂窺鎮江鎮江
丹徒縣志據餘

卷二十一 紀聞

四

依北固山爲城以運河爲濠形勢險固非寶山比駐
防副都統海齡庸繆人也牛鑑旣失吳淞口自應馳
守鎮江會參贊齊慎提督劉允孝之兵且節制副都
統嬰城固守洋船必不越鎮江而徑犯江寧上之可
以徐籌火攻次之卽與敵講款亦不致操我死命無
求不遂乃牛鑑從丹陽句容直走江寧海齡又拒齊
慎劉允孝使戰城外惟以駐防兵守城內鎮江繁富
十萬戶海齡禁難民遷徙出城出者皆刃夾而搜括
之日捕誅城中漢奸合城鼎沸凡木石油炭火器守
城之具一切不備又不團練居民鄉勇助守城中僅
駐防兵千餘與綠營兵六百寥落如晨星始則城外

軍擊其西北登岸之賊相持二三日英佯攻北門而潛師梯西南入城土兵僅斫其一二二人敵已蟻附上守兵皆潰英先焚滿營海齡爲亂兵所殺鎮江陷虜掠焚殺寧波寶山夷酋璞鼎查卽欲出江前赴天津而馬禮遜阻之謂此中國漕運咽喉扼以要挾必可如志遂不果是時洋船八十餘艘砲聲震江岸自瓜洲至儀徵之鹽艘估舶焚燒一空火光百餘里揚州鹽商許銀五十萬六月二十八日遂偪江寧東南大震

魏源道光洋艘征撫記

乾隆十年鎮江程姓者抱布爲業夜從象山歸過山腳荒塚纍纍有小兒從草中出牽其衣程知爲鬼呵之

丹徒縣志摭餘

卷二十一 紀聞

罕

不去未幾又一小兒出執其手前小兒牽往西西皆牆也牆上簇簇然黑影成羣以泥擲之後小兒牽往東東亦牆也牆上啾啾然鬼聲成羣以沙撒之程無可奈何聽其牽曳東鬼西鬼始而嘲笑旣而喧爭程不勝其苦仆于泥中自分必死忽羣鬼呼曰冷相公至矣此人讀書迂腐可憎須避之果見一丈夫離肩昂背高步濶視持大扇擊手作拍板口唱大江東于于然來羣鬼盡散其人俯視程笑曰汝爲邪鬼弄耶吾救汝汝可隨吾而行程起從之其人高唱不絕行數里天漸明謂程曰近汝家矣吾去矣程叩謝問姓名曰吾冷秋江也住東門十字街程還家口鼻竅青

泥俱滿家人為薰沐畢即往東門謝冷姓者杳無其人至十字街問左右隣曰冷姓有祠堂其中供一木主名士媚乃順治初年秀才秋江者其號也

袁枚新齊諧

按冷秋江名士媚明末諸生世居東鄉華山此皆誤

吾鄉于度鄒忠倚前身相傳為金山寺老僧明末有新狀元舟過金山者觀者咸歎羨之老僧曰狀元亦人為之耳有何難哉崇禎庚午科于度之父名兌金者挾重資赴金陵鄉試泊舟京口忽起大風行舟多覆鄒君啟其篋指謂人曰吾財不吝有救得一人者予十金於是人爭赴救溺者皆活而金亦盡矣老僧於山上見之曰此人有德吾去矣遂入定坐化是科鄒

丹徒縣志

卷二十一 紀聞

望

君中式歸見老僧入定而于度生順治九年壬辰于果狀元及第

勾吳錢泳履園叢話

京口題壁云滿篷飛雪覺春寒怪底停舟縮頭看似此風波公莫渡不如歸去老江干可見出門者有何意味而必欲朝秦暮楚何耶

同上

吳門顧杏川太史

元愷

於嘉慶十八年秋從金陵鄉試

歸過京口偶感冒寒熱大作忽作麤語云有北固山神偕鎮江府城隍丹徒縣城隍俱來迎且賀曰君今科必魁榜君祖父有三善上帝皆紀錄之矣顧不信遂同往文昌宮查訪云云及歸家病旋愈是科果中式

同上

廿三日夜半距丹陽七里水淺甚爲羣舟所壅廿四日
黎明始達暮抵鎮江時世望弟與戚友數輩相送依
依不忍捨會久暑憊甚當捨舟而陸意畏之乃計以
爲治裝者停小時作金焦遊廿五日早與胡守維新
會守慷慨持論議斬然談久之始別呼舟渡逆風破
浪而東舷側數就水興發不可已亭午抵焦山數子
已在僧具蔬食欣然爲之一飯少間出所攜酒飲飛
觴至數十不醉蓋余遊茲山者再矣登絕頂謁焦先
生祠縱步幽閒探瘞鶴銘讀之山之勝幾窮至是以
暑故絕不復他往酒行至暮輒大眠度四鼓月出起
呼酒之山門小坐時風尙厲松聲怒發噌吰颼颼若

丹徒縣志摭餘

卷二十一

紀聞

三

吼濤濤復怒來擊石與相應卽不敢稱鈞天秦王獻
浮太廟時浴鐵三萬前後部鼓吹想當爾也缺月松
頂涓涓湛湛時復媚人四望連山蒼翠出沒俄震方
啟白顧見羣星時久其時月魄亦漸薄久之東南一
綫深紅隱起雲物射之皆成五色其受光以遠近爲
濃淡倏忽萬態深紅益高變爲黃金數千道芒刺射
眼所謂虹旌霓旗繽紛導擁恍忽若有之日濼濼徐
上大可圍十餘丈色正黃搖動若鎔金在冶舍弟輩
咸大譁謂奇絕浮白無算辰刻命餘舉揚帆抵金山
頃刻而渡倪所攜酒未至振步江天閣登妙高臺長
嘯四望令人有狹宇宙凌天表意酒至改席一小閣

劇飲懽甚尋呼巨龜出食之龜體兼數席色純綠如玉可鑑薄莫始復歸京口小憩舟所二十七日黎明

與諸友別出京口便風揚帆抵瓜洲日始出大約如

昨而雲物光彩半之遂登陸舟州山人藁 王世貞適晉紀行

余以六月十七日抵京口而楚舟以前一夕至楚舟頗

宏麗若浮屋為之一快以明日出江釃酒羊豕饗神

畢為具金山別送者登絕頂悵望久之還飲僧寮熱

甚扣舷呼巨龜不起問之僧云中兵毒弩死他洲矣

蓋僧實不勝煩斃之耳予欲修焦山故事至五鼓候

月與日出沒而僧寮穢不可宿客興已闌乃攜臥具

下至舟別送者掛帆發晨抵儀真舟州山人藁 王世貞江行紀事

丹徒縣志摭餘

卷二十一 紀聞

四

琴夫詩有奇氣京口詞人之冠也嘗見其讀戰國策書

後九首之一云解紛如解玉連環一笑飄然東海還

世上共求天下士不知東海在人間北江詩話

琴夫與夢樓道人同時齊名歿後無子詩散失如皋汪

春田觀察梓其遺集不及什分之一勉廬詩話

琴夫最工近體情景兼至客京邸名公卿無不折節下

交晚年有句云青蕪半冷英雄跡紅杏翻憐少壯心

感慨至矣嘗游平山有句云多少樓臺歌吹沸更無

閒地看黃龍想見吾州當時之盛寄心齋詩話

楊石漁幼失怙恃其外家居吳門因寄養焉幼以詩為

李客山惠松崖兩先生所器重潤故

石漁僑寓吳門與李客山黃芳亭吳企晉輩作文字游
今過虎阜靈巖間猶有道其風流者羣雅集

顧崧庵工詩文善行草書髫年以畫受知於學使彭公
元瑞入都館莊親王府遨遊諸公卿間故得縱觀宋
元墨蹟而畫益進程青溪云宋人千巖萬壑無一筆
不簡元人枯竹瘦石無一筆不繁崧庵得之性瀟灑
好飲酒歌詩時目爲狂自若也今旋里求書者滿戶
幾欲作鐵門限云墨香居畫識

崧庵幼在京師有顧楊柳之稱蓋善畫楊柳也其山水
人物花卉禽魚無不臻妙春草堂詩話

丁亥之夏臥病江冷閣中一日當晝夢文昌帝君畀以
丹徒縣志據餘紀聞 卷二十一 罷

斑玉瑄二覺而有感爲表謝之江冷閣文鈔 按冷

十六日戊辰晴行二十七里小泊新豐又二十七里過

丹徒鎮行三十六里午後到鎮江以水縱良久方抵

丹陽十七日巳巳晴上館盥櫛仲舅欲同謁王侍御

而侍御已在門侍季舅同沈抑強去僞別侍御聞泊

舟金山因約同游窮覽勝處主僧寶印首座心鑑皆

嘉州人侍御方赴夔州不謂得見於此以小詩道別

又辱和篇入船別其家遂歸仲舅招副使早飯抑強

復攜具來嚴墨卿同集二鼓方散樓鑰北行日錄

瘞鶴銘沈江千餘年矣宋時撈出端午橋尚書督兩江

時令人募有以佚文獻者每字酬五十金已而有人

持殘刻求售云曾爲何夢華所藏端如數酬之嵌諸新石而爲之跋置諸定慧寺然字勢波磔與原石似不甚同不知其爲真贋也

汪康年雅言錄

瘞鶴銘近來拓本愈漫漶獨鶴洲和尚手拓者筆勢圓勁頗有精彩

同上

焦山定慧寺藏明楊椒山先生手臨雲庵將軍卷游客索觀或卽題誌其後僧人無由阻止濫劣甚多復不能分別一概存留一卷不足拓爲副卷端午帥至焦見之擇其尤劣姓名不彰者直以墨筆鈎去令重裝池余已酉游焦親見之寄語好塗鴉者慎防此一筆

鈎也

同上

丹徒縣志摭餘

卷二十一

紀聞

吳

余游焦之自然菴僧出一盒啟之一物橢圓中空質似石灰和泥所成僧以爲異不知卽駝鳥卵壳耳又一明太祖像又有冊頁兩本題逋逃藪三字乃水滸諸人像云國初福州人所繪然轟天雷所持大似洋鎗亦可哂也阮文達秋樹讀書圖本置自然菴後失去或購得上端午帥付定慧寺藏之

同上

柳賓叔名興恩丹徒壬辰舉人七十六歲精於穀梁之學曾在阮文達家課讀十餘年學術頗有家法也

曾文

正求闕齋日記類鈔

登焦山絕頂一覽各寺皆在山之南同游者爲彭雪琴侍郎玉麈李小湖大理聯秀黃昌岐軍門翼升鄧守

之布衣傳密方元徽大令駿謨陳小浦廣文方坦皆隨余自金陵來者也李雨亭都轉宗羲莫子德大令友芝張芑堂觀察當年皆自揚州來者也在山頂山北兩寺小憩良久歸寺觀雪琴守之作畫數幅同上由焦山開船至北固山登山四望雄壯伫立良久旋入鎮江城在知府周輯瑞署後登城一望與北固山相距兩箭許守府城不可不兼守北固城周約十七里旋出城八里登金山已在南岸不復在江心矣眺望瓜洲之小口子轉入新河庶小船免行江路而大船灣泊鎮江對岸亦無風濤之險也同上

丹徒縣志摭餘

卷二十一 紀聞

四七

韓滉得竹林寺僧治蠱方刊石傳之其方以五月初桃皮生用二錢斑蝥以麥麩炒去翅足二錢大戟生用二錢三物共爲末以米泔淀爲丸如棗核形中蠱毒者於食前以米泔下一丸坐靜室中忌婦人孝服猫

犬見之

程鴻詔迎靄筆記亦見江南通志鎮江府紀聞

明宏治中京口人錢寶者善醫嘗游齊魯間遇一老僧能臥大雪中雪爲不積問其年數百歲矣後至金陵居天界寺撫摩能療諸疾後尹蓬頭客於錢氏錢偶言僧狀尹曰吾師祖也別來久尙無恙耶已而尹去老僧復至京口錢爲述尹語僧曰是吾孫也徐出度牒示錢則唐大中四年所給已八百年矣僧秦人不

知名字

王士正香
祖筆記

鎮江石

鎮江去城十五里地名黃山鶴林寺之西南

又一山名峴山在黃山之東土中皆產石小者或金質大者或鑄取相連處險怪有萬狀色黃清潤而堅扣之有聲間有色灰褐者石多穿眼相連通可出香

山陰杜綰
雲林石譜

蘇氏排衙石

鎮江蘇仲恭留台家有石如蹲獅子或

如睡灘鷺羅列八九株太守樓知勝目之為蘇氏排衙石又有一石筍高九尺有奇渾然天成目之為棟

別本云
蘇棟梁

悉歸內府矣崇甯間米元章取小石為研

山甚奇特峴山石多清潤而產黃山者率多土脈少

丹徒縣志摭餘

卷二十一 紀聞

哭

有鑄治者

同上

金山僧院有詩云老僧齋罷關門睡不管波濤四面生

羅隱句也

阮閱詩
話總龜

孫元規最不喜僧帥浙東過潤州甘露寺令僧盡去詩

碑獨留僧文灝詩云本為向空寬病目卻因多見動

閑心

聊復翁趙德
麟侯鯖錄

張子野云往歲吳興守滕子京席上見小妓兜娘子京

賞其佳色後十年再見於京口絕非舊時之容態感

之作詩云十載芳洲採白蘋移舟弄水賞青春當時

自倚青春力不信東風好誤人

同上

李公山節汾州人也端平中朱湛盧復之使北展覲八

陵引李與王仲偕南李初任鄉郡節制司幹官後任
西山倅時正倅陳三嶼松龍會寮友於多景樓賞楊
妃菊令諸妓各持紙筆侍眾官請詩李自江上後至
酒一行起背手數步吟云命委馬嵬坡畔泥驚魂飛
上傲霜枝西風落日東籬下薄倖三郎知不知辭至
精切或至閣筆

蔣正子山房隨筆

焦山有野意大勝金山獨瘞鶴銘之疑未決欲親往勘
之蓋此銘諸家若聚訟以爲王右軍書者蘇子美也
以爲顏魯公書者歐陽公也以爲顧況書者沈存中
也以爲陶隱居書者黃長睿也以爲諸公皆非而別
有隱君子書者董道也惟黃魯直斷乎以爲非右軍

丹徒縣志摭餘

卷二十一 紀聞

吳

不能謂爲大家之祖龍爪遺法歐虞顏柳諸公僅得
其髣髴津津乎不啻口出魯直於書學極深似有可
憑近世名士以爲據茅山志願況居菖蒲潭自號華
陽真逸銘字是況無疑不知銘後有貞觀王瓚已學
其體況去貞觀年尙遠何得先有此書百聞不如一
見今風色如此其緣又怪可歎也或曰此時水未落
銘石不可見遂返棹

袁中道珂雪齋集

鮒魚來前三日有黑小蟲浮水面焦山門中尤夥漁人

候以下網名之曰鮒魚糧

耐叟日記

鎮江四姓許甘左紀

太平寰宇記

錢壑杉孝廉幼而孤露門庭荒廢睠懷故宅每形於詩

讀其過舊居云束髮孤兒去歸家十載遲殘編先澤
在舊事老隣知掃舍愁深薛循檐覓故枝轉嗟不如
燕巢屋已多時令人嘆息

寄心盦詩話

鶴山七歲隨其尊人紫芝大令游金山賦長句二篇長

老驚羨擬之鳳毛

羣雅集

韓嘉言字仲默幼負才藻在都門聲譽日上楊繩武比

之崔龍謝鳳

張學仁潤故

仲默常言文枯而感以詩之藻績則腴文蹇而悟以詩

之智巧則捷文俗而瀾以詩之雋永則雅文雜而疏

以詩之簡淨則純四語深得詩文相生之妙

種竹軒詩話

鮑論山戶部少負雋才文采秀逸在都門與洪稚存吳

丹徒縣志摭餘

卷二十一 紀聞

辛

穀人趙味辛唱酬最密法梧門稱為詩龕四友

潤故

論山郎中為海門徵君哲嗣詩有家法虹收山店雨月

出舵樓煙水暗疑沉墨山明不變煙兩押煙字皆新

寄心盦詩話

張石帆恃才傲物酒酣以往輒高歌罵座人不能堪卒

坐是受困游京師館英文肅邸三載文肅贈別有依

人久識孤王粲之句

羣雅集

宮霜橋

國苞

在都中英文肅愛重之與丹徒張石帆稱

江上兩詩人

寄心盦詩話

豐城陳氏為宋文正康伯公後自南宋卜築以來至嘉

道間有六百餘戶二千數百丁粵匪亂兵至該村陳

氏族長有名道財者率族人鼓義奮勇悉殲之匪率隊至其族諸人猶能以耰耒之屬擊匪敗走匪憤極於咸豐十一年三月十七日由四面進兵專擊該村陳氏族人猶復力抵兩晝夜後以軍火不敵力竭無救而是日死事以千計該村乃成焦土而豐城以下諸村得以保無恙者今之人猶道及之皆豐城肯當賊之衝也獨承平六十年陳氏子姓尙不滿四百云

陳氏家乘

迴龍山有支嶺土名青龍背山迴龍麓爲八公洞漢隱庵庵左有金沙泉近鄉田畝均資灌溉青龍背去焦山象山僅十餘里焦象二山鎮江門戶象山上曩建

丹徒縣志摭餘

卷二十一 紀聞

五

礮臺以扼要隘青龍背地素歸庵僧及孫姓主之宣統辛亥奸民張某聞山產煤盜賣地一百一十畝與日本人武田寬次郎開採礦產居民惶恐該區公衆陳情訴縣經京官姚錫光等並邑紳李炳麟等據礦務正章十二章五十四條緊要水利之處三里內不得施工該地緊接金沙泉水利攸關又十一章五十四條礮臺營寨所在其界綫三十里內尤不得施工徒邑焦象二山均爲礮臺要塞逼近礦地而其地又昔賢暨柳孫兩姓墳墓所在通力爭持甫經工商部

批照礦章取銷飭禁

繆述谿魁齋隨筆

癡海龍泉人宗因寺僧多騃故號爲癡海耳無垂珠唇

不蓋齒其師謂曰汝貌陋福薄宜目勉癡海感其言
日至東廊觀音堂焚香百拜每一拜以手扯落其唇
並耳三年不怠不覺上唇下垂而兩耳及肩癡海拜
不已忽一日睡於蒲團夢所拜觀音垂手摩其頂曰
賜汝聰明福相寤覺心境豁然如脫重病遂通諸部
經典後著金山水陸儀文盛行於世處州府志
吳人祝允明京兆書法爲本朝第一至所書唐張祜金
山詩尤得意者予友元美太僕雙鉤一幅寄予甚珍
之因付鎮江守林君刻石山中亦茲山佳翰也張嘉允肖跋
夫題

李妙惠揚州人適南昌士人盧穿穿下禮闈第讀書西

丹徒縣志摭餘

卷二十一 紀聞

三

山寺有同名者死京師鄉人誤傳父母強之嫁於江
西鹽賈謝啟自縊者再爲人所救乃勉從父母命比
入謝家堅侍謝母傍執役不去啟不敢犯旋復求爲
尼不得尋發舟過金山題詩寺壁云一自當年拆鳳
凰至今消息兩茫茫蓋棺不作黃金婦入地還從折
桂郎彭澤曉煙歸宿夢瀟湘夜雨斷愁腸新詩寫向
金山寺高挂雲帆往豫章穿後登第遊金山見詩知
爲妻作從謝所迎歸爲夫婦如初圖書集成

北呂村在郡城東三十餘里遙對丁家缺大山相去半
里許依山孤峙破屋三間俗呼爲獨家村咸豐九年
村人於屋後鋤地種瓜忽墮穴中深可丈餘內平屋

三進最後一朱棺懸焉遠近聚觀知爲古墓仍封其
穴明年紅巾賊大至擄殺甚慘村民數百奔匿墓中
而虛掩穴口竟獲免墓穴之現若有靈庇王保之茂
才明哲時九歲以避寇僑寓村中曾隨眾縋穴入視
惜在稚年未深考何人之墓也正志卷二宋陵山土
人云上有劉王墳蓋
劉宋之祖陵也山上有孔道曰鄧家關土人訛稱丁
家關此山或謂卽大山也按此丁家關大山應卽爲
北呂村遙對之山村民避寇之墓未知
是否卽劉王墳也附識之以備攷證

京口名由京峴城昉東吳獬兒之屯已荒寄奴之草空
綠三山不遠意欲凌雲六代全非影如過電則夫觸
攬古事追述前游仲晦裁寄友之篇文房賡對月之
什固皆吟緣愴結情以遙生者也若夫表天塹之雄

丹徒縣志

卷二十一 紀聞

三

據地圖之險襟吳帶楚負海依江彎弧於鐵甕城邊
試馬於佛狸祠畔稽往載莫不設連帥羅禁兵嚴斥
埃恃爲重鎮隱若長城自夫宙合清寧區陬混壹山
川無色戎馬無聲樓連綠水之橋亭接浮花之鳴園
林纒屬人物丰昌元化所甄於斯爲盛亦有練塘簡
瀆黃鶴白龍飛翠涵清飲霞招景鍾乳之石菖蒲之
茸銀鱗翠鳧之產紛紜雜襲於其間方袍羽裳業冲
味道之倫游翔憩息於其內洞達登真之訣流連招
隱之詩風響松間泉流竹所並留情致足寫幽娛余
聽鼓收帆聞鈴待渡沽南徐之酒烹北固之魚燈火
揚州難尋一夢帆檣瓜步已熟三年翫白雲之飛山

詩心有戀催明月之落水調重歌遙見寒流惟有漁
火沈沈與星相亂不覺夜之深也

吳錫麒還京日記

我瑯琊阮亭王使君體兼仁智才妙登臨慧業才人來
從天上廣陵公暇乃以秋冬之際沿流放浪縱覽大
江登浮玉入焦巖東望海上三神山飄然有遺世獨
立之想已而循江岸道象山振衣北固之多景樓厯
險窮幽扳蘿捫石弔海嶽淨名於崩崖敗壁中低徊
不能去復折而訪黃鶴招隱諸山與高僧野老執拂
揮麈考山中逸事所至揮灑翰墨不移日而題名及
古今詩哀然成集筆墨之外自具性情登覽之餘別
有懷抱御風騎氣飲露凌雲蘇子瞻五百年後獨有

丹徒縣志摭餘

卷二十一 紀聞

十四

公耳余家世南徐與三山夙有因緣竊謂山水文章
結胎則一金山似莊焦山似屈北固而外則世說水
經註也今讀我公之文飄渺蕭瑟煙雨迷離諸山之
奇俱從五指拂拂欲出諷詠數過不啻髯蘇米顛在
左酌中冷舞妙高剖處士之雙柑聽袁絢之三弄華
陽之鶴猶在人間杜鵑之花未歸閬苑江山千古文
章千古我公之樂不千古哉自茲以往公之游在三
山予之游在此集試與天下之游者共見之

張九徵序王士

正過江集

咸豐庚申夏髮逆陷丹陽四月八日竄郡城大港鎮趙
氏鎮之世族也聞賊至聚族禦之族有邦瑞念父慶

壽老謀於兄泰及弟晉奉父渡江避賊抵馬腰山喚渡止一舟慶壽曰逃者眾若盡登舟必覆姑待之賊突至慶壽與邦瑞被脅去泰乘間遁越二日賊令新擄者登冊慶壽默念曰被擄吾已辱復錄姓名則再辱矣乃易姓名王文元邦瑞易姓名方玉爾歷十餘日賊顧慶壽曰王某衰老不任事遂放歸而邦瑞乃陷賊中六月杪城東鄉團來攻城賊令各備器械出戰邦瑞自揆曰大丈夫每以死疆場爲幸然從賊敵官軍若死官軍手則官軍以吾爲賊誰別爲非賊也若不從賊敵官軍亦必死賊手又誰別爲不從賊而死也忽又自計曰人各有死與其爲人殺曷若自斃

丹徒縣志摭餘

卷二十一 紀聞

五

忽又自念曰死貴得所吾無當死責死亦何裨於君國值鄉團敗邦瑞未出戰八月二十九日邦瑞隨賊至板橋鎮喜曰此脫身日矣乃藏於季姓家黃昏復匿於寶華山下徐宅靖江八圩港趙姓有莊房一名繼餘投宿遂得悉父由此歸長兄於初一日伏叢葦中賊至跳於江遇救獲生而族人慶錫慶恩邦和俱靖難死邦瑞旣出因自爲再生記誌其顛末願髮亂死者甚眾而慶壽邦瑞於死中得生固其幸也亦其不肯從賊一念生之也

繆述谿覺齋隨筆 按邦瑞譜名謙字懷清孝友有傳

許沅字秋颿少肆業同文館然重氣節恥奔競雖致力新學獨不肯阿附西人浙江世方伯增總理浙省洋

務聞沅名辟為佐而沅遇事斷斷不稍屈西人豪富
某謀攬浙贛鐵道敷設權遍賄朝貴議垂定浙人大
譁沅佐方伯力爭某語沅曰倘事成當酬五萬金沅
不為動議遂寢晉撫寶棻沅才調理外交時嚴禁
罌粟天主教徒恣為利藪官不能詰既與主教約毋
袒縱遂無犯禁者永甯州教徒某藉尸圖詐沅讞明
案遂定孝義縣民爭渠械鬪積歲不能決上七村多
教徒尤橫行壟斷水利下八村民苦之沅令循舊例
爭端遂息陽曲太原兩縣產煤向納釐教徒抗不納
沅與主教爭乃與平民一體輸納吾華自通商來交
涉罔不失敗大半理外交者甘媚西人國體遂日損

丹徒縣志

卷二十一 紀聞

五

乃莫探其原僉曰無外交材夫豈無外交材哉倘人
盡如沅則西人何至猖狂日甚也

同上 又節黃粹存師筠齋雜議

鄭時慶山西人為吾郡太守端嚴清介靜鎮為治卒時
惟布被覆身囊中青蚨數百而已行路哀之士民斂
錢送其喪歸里以予所見當事之清廉者無逾此公

己 法嘉蓀養痾囑語

陳延禧吾邑諸生工詩善書性落拓不羈隱於賈順治
中至江右販布過南昌適滕王閣燬後重建中丞蔡
士英招集四方名士將於是日落之胥役奔走樓下
先生偶散步登最上層見筆墨羅列粉堊修整興至
走筆題一律於壁拂袖下樓去胥役見之恐以是見

責急趨至江泚先生已解纜矣指舟痛詈之際而中丞至見詩極加稱賞遣使持刺以小舟相招追十餘里始及之既至相得甚歡是日諸名士皆以先生詩攔筆中丞卽石刻是詩於王子安序後盤桓十數日而別

同上

王夢樓太史偶論近代書家云董香光書如修煉人積力既久漸有仙風道骨吾潤筮江上先生書是生而具鎖子青骨宿世高真不徒藉學力者故其妙處非他人所能實屬本朝第一此論殊與鄙意合

同上

高南引名指吾鄉康熙時人憶乾隆庚寅四月與吾友程子隱礮閒步小市以百文購得其所著夢酣詞二

丹徒縣志摭餘

卷二十一 紀聞

七

集一卷字畫端楷滿紙丹黃前有筮江上先生序稱其家極貧芒屨布衣混迹塵世足不出戶庭而名滿孚內則亦當時聞人遍問吾鄉高氏無有知之者噫仰屋梁而著書名位既不顯遂埋沒於蠹魚敗篋者多矣豈獨高子哉

同上

山水之勝凡人不能身歷其處尋幽絕險鮮有不遺其佳妙者此惟荒寒好奇之士能之若達官長者既限於勢分又誦於時日豈能得其真哉吾郡北顧一山拱列江上與金焦鼎峙奇秀絕倫而其佳處尤在沿江石壁蜿蜒峻拔儼如翠屏近讀陸放翁入蜀記云此山多峭崿如削然皆土也國史以爲石壁峭絕誤矣

蓋放翁未至其處也噫放翁且然餘人更無論矣上同

周靜植先生名玉立吾鄉人詩文著述甚富困于場屋

有盛名其詠梅一律極佳歿後先將軍曾用其中一

聯作起句憶之云清夢往來惟夜月素心今古幾詩

人周周郎好詠而今絕說與梅花定愴神近見時人

詩選內有方元醴梅花一首卽先生作也先生詩文

皆隨作隨散其外舅江甯人故傳落江甯尤多一時

名下或借刻之蓋不止於此矣上同

夏靈湘太史名沅曉堂先生之從叔也與丹徒鎮周氏

爲中表戚周氏無子欲乞太史幼子爲嗣太史曰吾

宅後臨城河對岸預備倉口有小木橋常溺人君能

丹徒縣志摭餘

卷二十一 紀聞

五

爲我建一石橋當以幼子繼君周故巨富卽日鳩石

工起造月餘橋成抱太史幼子去因其乳名太平遂

以名橋今夏氏已無後人周氏亦鮮有知其事矣上同

余少時閭閻交遊如張微子張贊亭平伯穎叔昆仲五

峯牧山昆仲張湘洲汪迎亭何菊裳何江樓儲玉琴

皆朝夕過從鬪韻釀飲無虛日旗亭野館常攜樽匣

視以行微子酒政最精每有讌會或微子後至普席

改觀正如李臨淮易郭汾陽爲將經其部署壁壘一

新玉琴晝夜聯吟毫無倦色偶不拈弄便覺反側未

安人咸以稽生鍛阮生蠟屐比之不四五十年或游學

他郡或奔走衣食不能常聚余憶在圖山寄贊亭書

有云微子去而酒政衰玉琴去而詩壇冷同人讀之皆爲惘然同上

郡城西南四十里曹王山東麓有蔡京墓土人呼爲蔡閣老墳山南二里許有蔡家村今村中顧無蔡姓村西三里爲徐灣村再四里爲大山南麓有高侏墓凡六七所陂陀相望不辨孰爲真墓蓋師曹瞞疑塚故智也近墓有侏廟山外句容境之高家邊孔家邊南莊等村多高姓皆祖侏歲以二月二日合祭於廟按宋史侏死於靖康元年五月附見欽宗本紀其年春徽宗駐蹕鎮江侏實從行豈死於斯卽葬於斯耶京亦於是年七月死於潭州子孫二十三人皆分竄遠

丹徒縣志摭餘

卷二十一 紀聞

堯

地潭去鎮甚遠何亦葬此夫誅奸諛於旣死發潛德之幽光者古今同情也城東京峴山宋宗忠簡公墓在焉山川增色矣而二奸朽骨竝藏垢茲鄉顧鮮有知者故特記之聞者將視爲何如也

采訪稿

京口三山鼎峙靈秀所鍾代有聞人略可臚紀前明兩大學士楊文襄靳文僖其最著者 國朝大學士則張文貞公而裔孫錫庚以刑部左侍郎督浙學殉粵匪難亦謚文貞封豎若張鵬撫魯徐楊嗣曾撫閩戴三錫督川巡按如顧仁筮重光藩臬如蔣寅嚴士鉉歐陽旭王芥園趙霖尤以徐楊之圖像紫光閣戴之兼署成都將軍以及鄒錫淳簡放淮揚道奉旨本省

毋庸迴避均爲異數其以文章顯者鼎甲如張玉裁
夏沅何金蘭王文治李承霖張錫庚會元如裴之仙
解元如張九徵袁孟義蔣欽宸柳綦張潮普張深嚴
保庸張培壽薦舉鴻博如張九徵鮑皋張逸少其祖
孫叔姪兄弟進士如張文貞公父九徵子逸少兄玉
裁弟仕可是其父子叔姪進士者如丁紹周立幹立
瀛立鈞是其兄弟叔姪進士者如趙佩湘霖楫及姪
樹禾是其簡放總裁如張文貞督學如張九徵王際
有歐陽旭張仕可張逸少徐楊嗣曾茅元銘趙佩淵
李承霖丁紹周張錫庚楊鴻吉丁立幹支恆榮典試
如張文貞張鵬何金蘭歐陽旭徐楊嗣曾鮑之鍾茅

丹徒縣志

卷二十一 紀聞

卒

元銘趙佩湘趙楫周銘恩李承霖丁紹周蔡逢年袁
善丁立鈞支恆榮至同考官則紀不勝紀第法梧門
祭酒編清祕述聞謂斯亦允稱榮選仍按年編錄之
今準斯旨前已列學試差者不復錄得夏源夏慎樞
王之湖劉鴻緒王文治陳書曾丁立瀛高覲昌如干

人焉

省齋
隨筆

府學近傍日精山麓實亦北固之支脈也道光中無錫
薛湘以名進士任教授後其子福辰福成皆中乙榜
季子福保亦知名福成由甯紹台道充出使英國大
臣官至左副都御史經濟文章尤爲時冠元和陸文
端公之祖孝廉嵩於道光末任訓導文端實誕於署

中故名曰潤庠以鳳石字焉

學舊有麟鳳石同治初各一今尚存

訓導汪亮鈞亦元和籍在任幾四十年初甚清貧及

光緒中四子俱貴家門鼎盛鳳池以舉人官中書歷

部曹科道出守長沙鳳藻以癸未翰林充出使大臣

升侍講鳳瀛以拔貢為湖北漢陽守調補長沙鳳梁

庚寅翰林擢守四川順甯故形家謂兩署皆主昌後

而副署尤勝云

蛻齋隨筆

京口自國初以來名流輩出文采風流後先照耀嘉道

閒猶能嗣響咸同兵燹後所見惟郡城楊子安孝廉

履泰焦東周子如明經伯義博學多通時藝外能以

詩古文詞提倡後進孝廉天文奇門醫卜雜技靡不

丹徒縣志摭餘

卷二十一 紀聞

空

究澈行跡所至後生環集問難辨析逸趣風生令聽

者忘倦生平走筆成章弗加點竄嘗於京師觀劇當

筵得懷古詩十二首蓋藉其歌舞抑揚益以淋漓盡

致又觀里中演會而悟行文章法疎密散整參差錯

落之變既絕意進取遇鄉會科首場四題輒有擬作

多煌煌巨篇至老不倦獲雋者或借刻行卷座師胡

文忠公督兵皖鄂時專檄招入幕府不果行李廷尉

聯琇嘗序其制藝刻好雲樓集中弟子數百人多以

宦績學行著如延清姚錫光茅謙戴以珣恩沛奎照

輩其尤著者明經亦門牆鼎盛余提戎嘗邀贊戎務

未久辭歸與孝廉皆性忼爽喜談諧每會集論議隨

發樂極而笑聲若洪波之起惜兩人著作各十數種
身後皆悉散佚明經門下士刻其遺詩百餘篇孝廉
詩存後七子集者不盈百篇云

采訪稿

郡城粵亂來屋宇悉燬於火亂定大半貧窶未復舊觀
吾家舊居月華山下鄰左郡廟前爲睦姓明代由丹
陽徙居此舊有屋三所小樓三間地約二畝許其先
有分祠而後族繁多分居南關北關經亂祇餘荒基
歲壬子有名文藻者與族人榮德倡議卽舊址仍建
爲祠惟地祇存一畝八分有奇其一分數釐則不可
稽矣噫吾家於光緒壬午先君子鳩族人清理故址
圍築墻垣建楹三間乃年久頽敗歲乙卯又成荒地

丹徒縣志據餘

卷二十一 紀聞

全

予擬圍棘籬多半阻撓遂未果顧予雖同西鄰顧姓
定立界石恐嗣後又將迷失而不止如睦姓之少一

分數釐也

繆述谿覺齋隨筆

楊忠烈公漣劾魏忠賢二十四大罪凌厲深嚴實足褫
逆璫魄璫之恨忠烈益深而當時傳出先文貞公手
顧實非也然先文貞公亦弗辨及檻中自序始述及
之而亦未言出誰手顧非有膽有氣不能也今觀何
黎晴江閣集謂此疏係吾邑曹廷傑代作廷傑字去
非曾以疏草示同鄉陳允昌黎亦邑人所言必確去
非固無官守亦無言責祇與忠烈善而列數璫罪不
肯稍貸可見當日敦尚節義雖璫燄毒熾決不顧畏

不似今日士氣之衰也去非誠志士而不得僅以文士視之也而邑志僅列於文苑但言其嘗游京師未言此疏出其手殊沒其實甚願去非亦幸未筮仕否則必與先文貞公同被禍矣而先文貞公之橫遭瑞害原非盡由此疏然亦未嘗不因此也悲夫

繆述谿覺齋隨

筆按繆昌期諡文貞

米元章墓在吾郡長山下黃鶴山米公墓乃元章父光輔暨母閻合葬之所蔡肇志元章墓明謂以大觀三年六月某日葬丹徒長山下肇與元章同時豈所志反不實元章父母墓邑志云元章好奇葬親不封不樹人莫知其穴之所在是元章墓在長山下毫無疑

丹徒縣志據餘

卷二十一 紀聞

三

議黃鶴山之墓則其父母然亦莫識其處明米萬鍾謬指元章墓在黃鶴山而漕使練國事和之爲記自此記出而黃鶴山遂有元章之墓厥後賦詩者明有張繼孟 國朝有余京戴嚴釋涵中均以元章墓在黃鶴山而不求甚解則國事之記誤之也嘉慶邑志云呂宦某有墓在黃鶴山姦民因聳憲使米萬鍾與呂構遷呂墓立元章墓後遂遞相傳誤若是則萬鍾明知元章墓不在黃鶴山祇圖直其構而不計是非也且萬鍾果元章苗裔蔡肇之志何不取觀而惟逞一時之意竟甘心謂他人祖則不孝甚矣如謂黃鶴山米氏亦有墓在則以元章父母之墓爲其墓是滅

親而著子也其不孝不更大乎國事乃忍遂其過而貽誤後人國事之罪亦無可追焉

魁齋
隨筆

吾郡江口舊有埽埂一道攔江湖之衝激自北固山下江灘向西起至蒜山小馬頭止長三里許與內河口由西北向東長一里許而後轉南凡漕艘民船均停泊於此咸豐以前吾郡商業故極繁盛此埽每歲遇有坍塌卽加修補自粵寇擾郡後全沒入江商船無避險處商業由此遂衰而潮汐日向東南直來積淤成灘江面歲向西北徙舊有京口開漕河逐漸淤塞每屆秋冬則河身高於江面匪特停舟無所卽民間食水亦多不便又不惟商業隱受影響而風火並極

丹徒縣志摭餘

卷二十一

紀聞

齒

堪虞考埽埂故址今大半輪舟固船之所斷難恢復而公家聞儲有濬河經費卽西人固船亦出資而內外河道乃久不挑濬亦何漠視民瘼也而埽埂之存沒實於郡之盛衰有重係焉

覺齋
隨筆

英夷既破上海由黃浦入柳澗窺伺蘇州慮淺隘道梗而返時總兵尤渤營于大漲涇夷船不敢深入內河松江幸無恙乃改由福山口入犯鎮江圖山守兵新鑄萬八千劬礮發之聲震江南北然夷船遊逸而過不備亦不懼事後詢之士人則我兵以無彈之礮無子之銃虛張聲勢相率而逃矣夷人初到之地恃其財利蠱惑窮民至以洋錢一枚市胡椒數粒鄉僻百

姓願效奔走者所在有之某寺僧密白于夷曰城北依山爲垣故有塞門其虛可擣也夷登金山覘之礮發而城破淫掠搜括埒于甯波京口副都統海齡與妻孫同時殉節驍騎校祥雲投水死其父馬甲長松先一日登陴斃于礮妻鄔琅罕濟勒們氏懼遭污辱掩面以利刀刺殺二女然後自戕時六月十九日也鎮江故殷富西關以外爲一郡精華所萃夷梳之兵勇篋之土寇又難之富民遷徙者皆負肩擔悉被劫掠江甯常州聞警皆震已而潰兵跳集于蘇勢洶洶且內訌時李公星沅官蘇藩請于中丞斬剝劫者以徇人心少安

黃鈞宰金壺七墨

丹徒縣志據餘

卷二十一 紀聞

套

吾郡大江東北口本今揚子橋故名揚子江唐代宗以前吾郡尚非孔道行舟往來大率自揚子徑至采石磯自大厯後潮汐始不達廣陵漸積沙成陸乾嘉間汪中議於京口建浮橋二道謂自瓜洲至金山一里三分自金山至筲灣半之若南北造浮橋交會於金山此百世之利夫自中建議時迄今百餘年耳而今金山固與筲灣連且全登陸瓜洲又大半入江倘曩如中議百年之利尚不得何百世也中殆未審昔日形勢也而金山志載瓜洲南口向有鐵牛咸豐間洲坍牛沒入江今已入南岸漲灘中可見僅百餘年而與中時大異矣顧鐵牛據齊東野人云此牛有九皆

明劉青田先生鑄以鎮水者一在此一在廣陵今東城口一在廣陵邵伯埭一在金陵下關一在采石磯一在淮安其三牛則予忘之矣若然鐵牛亦不能鎮水也蓋滄變為桑桑變為滄此天道也今瓜洲幾全坍殆坍至揚子橋復其舊則又將南徙矣覺齋隨筆

國初乙酉江南解元張湘曉九徵視學河南乞歸康熙

十七年舉博學鴻詞儒家宰郝恭定惟訥薦之貽友人

詩云少不如人何況老身將終隱又焉文又遣懷云虛名定好羊公鶴肥遯深慚梁伯鸞京雒少年爭獻賦伏生接武賈生難人以是知公不出山矣子文貞公玉書性淡泊從不食肉日粗糲一盂或山藥少許

丹徒縣志摭餘 **卷二十一** 紀聞 奕

官庶子為明史總裁湘曉貽書戒之曰此非養身之道食不厭精汝未讀鄉黨耶退直後宜靜坐片刻養身節勞勿以膏自焚也殺君馬者路旁兒謂竭馬力以娛道旁耳目吾慮汝之馬力竭矣文貞聞命悚然加一餐焉鈞磯漫鈔

京口張文選公選九徵博物君子也嘗題予過江入吳兩集云筆墨之外自具性情登覽之餘別深懷抱此語可與解人道王士正香祖筆記

丹徒張氏吏部文選郎中九徵順治乙酉解元丁亥進士終河南督學諸子玉裁康熙丁未進士第一甲第二名及第終翰林院編修玉書顧治辛丑進士文華

殿大學士兼戶部尙書仕可康熙丙辰進士亦以僉事爲河南督學遷湖廣布政使司參議恕可康熙戊辰進士浙江杭州府知府王書子逸少康熙甲戌進士翰林院編修

王士正分
甘餘話

康熙四十六年

聖駕南巡至蘇州一日垂問故靈璧

知縣馬驥所著釋史

命大學士張玉書物色原版

明年四月張公令人賫白金二百兩至本籍鄒平縣購版進入內府人間無從見之矣

同上

歸田錄言張僕射飲啖過人晏元獻所食至少近人亦有相類者孟津王文安公鐸在京師諸公欲乞書輒置酒邀之飲無算爵或烹鷄卵數十盛以巨盎破餽

丹徒縣志摭餘

卷二十一

紀聞

宅

飣蒸餅亦數十枚雜投其中而食之立盡康熙辛未余貳京江相國張公素存玉書典會試每五鼓必盥燭起坐夜則和衣而寢食時或切山藥極薄煮熟置盂中不過五七片或炒米少許而已

同上

羣芳譜一書先祖前浙江右布政使象晉所著刻于虞

山毛氏康熙四十四年六月十二日奉聖旨開館

廣續命編修張逸少等四人爲纂修官至四十六

年二月告成凡一百卷

同上

近修明史初以徐閣學立齋爲監修翰學葉訥庵左庶子張素存爲總裁分纂者數十人後益以熊相國青岳首尾二十餘年成書之難如此

古夫于
亭雜錄

康熙十九年以御書手卷賜日講起居注諸臣侍讀

學士張玉書莊子說劍篇池北偶談

大學士張玉書被旨書冊子綾幅進呈隨賜臨米

芾大字一卷五言律秋帆尋賀老載酒過江東末云

元祐戊辰八月八日襄陽米芾卷首用康熙御筆

之寶居易錄

河南提學道張仕可字惕存京江相國素存弟也父公

選先以吏部為河南學道父子相距三十年余官京

師及見之同上

張九徵字公選江南丹徒人進士康熙三年任提學道

識鑒淵澄黜陟允當士皆悅服請托不行檄各郡邑

丹徒縣志摭餘卷二十一紀聞 矣

修葺學宮增置社學廣置書籍於庠序聽諸生就讀

凡境內陵墓祠宇有關名教者俱加葺治以潘岳忠

孝兩虧詳請燬祠搜訪殉難各名臣姓氏亟為表章

舉卓異祀名宦河南通志

張仕可字惕存江南丹徒人進士康熙三十六年任提

學道勤于校閱所取士多獲雋按臨各郡薪水自辦

不累民間祀名宦同上

吾鄉以山水名然顯晦亦異予嘗游城西四十里之曹

王山自山陽陟其巔較北固高再倍山腰有仙人洞

洞門大如一間屋左右石峰特起蔽門之半深約三丈

廣可五尋右黝黑處有泉深不測清冽異常僧導予

探其境并汲泉飲之其奇聞大類南郊之蓮花洞特石之陰隲稍遜耳視獅子窟則遠勝矣自來志京口山水者未及也

蛻齋隨筆

鮑海門先生乳姑行詠前明靳文僖公貴事自序雍正乙卯冬客持杜堇禋居人物巨軸來售一老媪衰病一婦舉乳就姥一兒立背後上有茶陵李文正七言詩曰乳姑行題爲戒庵學士詳詩意知姥爲學士大母婦爲學士母兒爲學士願考懷麓堂續集首載靳充道少卿所藏杜思男二圖請題爲賦古樂府曰朝母篇曰乳姑曲懷麓堂文僖公詩文集名公集有二初集致仕前作續集則致仕後詩文觀此思男所繪

丹徒縣志摭餘

卷二十一 紀聞

堯

固二圖不僅一乳姑也又考楊文襄公撰公神道碑祖妣吳妣范知公范所出字充道號戒軒則與文正之稱戒庵微異因識之亦以傳吾鄉軼事與佳話且藉以諷今之士夫也

覺齋隨筆

浙江嚴州府建德縣有九姓漁舟其婦女名眷屬與校坊等卽前代之官妓九姓則陳錢林李袁孫葉許何蓋陳卽友諒裔友諒率八姓與明太祖抗久不下及友諒平太祖怒不息貶九姓家屬入舟居操賤業令歲納丁口銀二百一十八兩零又歲納漁課銀九十兩五錢五分八釐此固明祖弊政也雍正間御史年熙噶爾泰先後條奏改賤爲良迨乾隆朝議准凡

山西陝西之樂戶浙江之丐戶概令除籍蓋自此無
官妓而此九姓丁口銀先於雍正時攤入田地山塘
故樂丐兩戶除籍時九姓之漁課未捐因之其業未
改顧其籍實除近百年來各船購買婦女作為眷屬
名其船曰江山以為營生官吏亦以徵其錢糧視為
官妓而不禁止同治間鄉人戴澗鄰先生槃守嚴州
深以維持風化為任爰力請大吏裁免漁課而清其
源復嚴禁其婦女再作娼妓而節其流於是九姓均
為良民矣嗚呼如先生者洵可謂良二千石也

齊隨
筆

李文安字逸齋丹徒素封為人慷慨好施予喬勤慤公

丹徒縣志據餘

卷二十一

紀聞

七

辦江北糧臺籌餉等務倚為左右手同治末蕪湖及
江北兩岸圩田全沒於水文安出萬金築如前至今
民猶賴之少工花卉渲染鉤勒取法南田

汪璿揚州
畫苑錄

潘恭壽字慎夫號蓮巢少學山水苦無師承時王夢樓

太守自雲南解組歸里以書家用筆之道授之其畫
日進既婁水王蓬心宸過訪夢樓見其畫異之因授
業焉蓬心授以宿雨初收曉烟未泮八字真言復取
古蹟日夜臨倣畫遂大進蓮巢能詩故所畫皆含詩
意兼工寫生濯濯如倚風凝露飯心淨土後又虔寫
佛象出入丁南羽吳文中之間其畫格清遠得力於
禪悅居多又時得夢樓題識故世尤珍重之

同上

焦山定慧寺住持借庵長老以詩名海內數十年有借庵詩集傳世記得詠秦始皇詩一句云千世萬世祇二世七字甚有趣味裘少時隨先子游焦山住伊樓先子日與借庵酬倡後數年余往金陵重游焦山借庵老健古稀之餘尙能策杖陪游大觀臺四面佛山頂焦先蝸牛廬諸勝余恭和先字臘字韻七古一章紀游贈借庵又和張河帥送銅鼓入焦山歌數十韻附刻先子焦山倡和詩石刻之後亂後送唐石佛入焦山圖詠先子焦山倡和詩諸石刻二十餘條交住持芥航上人收藏借庵法徒性源能作古文性源之徒月輝有膽有識西寇據鎮江燒金山又要踞賊兵

丹徒縣志摭餘

卷二十一 紀聞

圭

於焦山月輝孤身入鎮江城求見賊酋力陳古來用兵家凡踞焦山者皆敗績賊酋聽其言信之不犯焦山月輝將山中周鼎漢鑪歷代寶墨滅之石室山寺寶物居然無恙全仗月輝禪師一身護持之力也月輝真豪傑哉月輝去世芥航禪師住持年纔及壯詩畫精工齊學裘見聞隨筆按正志焦山僧清恆字巨超號借庵浙江海甯陳氏子有借庵詩草行世增藏五洲山

僧昌法

字華雨一字偶然

居鷺洲觀音寺喜吟詩詩皆哭其母

既而庵圯於水乃去為焦山司客山故冠蓋游覽區法視之蔑如獨喜才俊某生罄所有供之無倦意洋船抵焦山羣僧皆逃獨法指拄其間寺以無恙亂平

歸棲報恩寺之禮壇軒與諸名下士賢而有文者為冷落交時或困乏龕無鐙甌無飴猶齧不托借諸人聚談至夜分泊然不自知其貧也

同治上元江甯兩縣志

海嶽字中州本丹徒儒家子住清涼寺戒行精嚴工詩

登黃山有木蓮花賦數千言皆典雅精麗年八十餘

終上元江甯兩縣志

癩可京口人西清詩話云近時詩僧祖可被惡疾人號

癩可善權老亦能詩人物清癯人目為瘦權可得之

雄爽權得之清淡可詩如清霜羣木落盡見西山秋

又谷口未斜日數峯生夕陰皆佳句也

漁隱叢話

鷲峯住持如蓮示寂其師脫凡已退院數載至是復出

丹徒縣志摭餘

卷二十一 紀聞

圭

急求接席之人丹徒僧一真者常居竹林依恆贊和

尚有年矣脫凡素稔之將屬意焉而未決舉一壬字

請予測之予曰彼名一真壬字乃千中選一舍彼其

誰且壬旁加人為任其人足以勝任矣脫凡復書三

可三否字在佛前默禱三拈之皆曰可遂星夜往請

授法而為寺主諸山咸謂得人

江甯甘熙白下瑣言按正志焦山僧性

海別號一真

何鐵字龍若京江人僑居泰州工詩善畫揚人重之

秦州志

潘圭字鎮卿丹徒人畫世家蓮巢姪思牧子也工山水

惟師小米能續家法

揚州畫苑錄

鎮江士人某遊焦山夜飲薄醉月色甚朗某故善舞銅鞭乃潛至山門對月舞之盤旋往復意頗自得忽江中跳出一物魚首人身長丈餘掌如蒲扇臂短而腿粗跳躍而來某駭絕急避物已追至計不如先發制之遂以鞭迎擊其首中鼻怪吱吱作聲似亦怒舒臂來攫不能及身視其腿亦不能伸屈乃伏身猱進以鞭擊其腰跨怪益怒烈往來騰蹕某喘汗交作力將不支避入御碑亭物身長不得進攫亭上瓦擲亭中兩手撼亭岌岌欲壓雞鳴一聲怪忽驚竦已而羣雞登唱慌遽跳入江某始得脫從此山門夜不敢啟

室叢話

妙香

丹徒縣志摭餘

卷二十一 紀聞

三

潤州錢爲林孝廉乾隆年間設帳某紳家某生甚聰慧不肯讀書錢督之甚力某生曰予如石火電光明年卽當歸去讀書何益錢驚詢其故答曰某本係菩薩侍者以過謫人間不久仍歸本來錢因問爾旣自知能知我否時錢未有子并詢以何時可得答云師前生乃明季周介生今生應以孝廉作邑令命中不應有子如能廣積陰德可得二子一孝廉一拔貢次年某生果不祿錢自後遇有善事努力爲之後選山西邑令邑在萬山中崆崎險峻爲狼虎巢穴錢因事下鄉輿息山中輿夫俱熟寐道旁忽見白鬚叟執一小旗插某輿夫首錢怪之潛取匿懷中少刻一虎至似

有所覓不得遂去錢急呼輿夫醒告以故因促返署
細詢輿夫有何罪業輿夫自言曾經毆母錢命重杖
卅杖訖輿夫求主人賜百金爲養母貲卽出家爲僧
錢允之後果生二子長名之鼎赴京鄉試時錢已歿
未揭曉前忽有一僧求見闔者不納僧言有某嫗出
見始知爲脫厄之輿夫也遂入見之鼎言郎君今科
必中然有失德不能成進士須力行善事方可延算
語畢遂去之鼎果獲雋後壽竟不永其弟某以拔貢
終一如某生之言

科場異聞錄

正志校勘記

按正志建置沿革並歷代封爵各表除勘正補刊外間有誤處或補註或更易茲記若干條謹遵嘉定至順鎮江志例悉仍因之

卷二山 十一頁 烟宇奇觀亭字當作雨 二十頁六行至八行

明史兵制句制當作志 量度九江句度當作調

卷三川 十四頁十行 翼苑云交州阮郎按卷五十九

紀聞 第二頁作阮朗郎當作朗

卷四坊巷 十七頁第一二行 武甯街子午街 註不詳何改按

武甯街即今西門外大街 國初市房舊契多寫此

名

卷六寺觀 第一頁 吳主皓主誤王府志亦誤

丹徒縣志據餘 卷二十一 校勘記 三五

卷七宮室 四頁二行 談自省宅後嘉慶志有廣西巡撫

王政新宅在石礎橋西 光緒志漏載按張文貞家乘

又十五頁 桂亭後南山亭前嘉慶志有惕賢亭 見定

瑞光緒志刪又二十二頁十九行 楊一清別墅嘉慶志

下有後廢邑人何辰章就其址築園光緒志刪又培

風閣嘉慶志有小註百數十字光緒志刪已補刊是

輯續宮室志內

卷十碑碣 四頁十行 蘇軾萬丈碧潭後嘉慶志有蘇軾

與佛印手簡 淳熙戊戌釋蘊良立石光緒志收入古蹟

卷十一河渠 十三頁 皆近江小港江誤港

卷十七物產 嘉慶志注云按舊志物產五百餘種頗

嫌泛濫今刪存三十五種皆徒邑專產也光緒志有五百八十八種蓋舉康熙志所收者又悉以入之矣

卷十八物產

二十七頁 鮒嘉慶志作鯮 又行二十 鮒

嘉慶志有按京口錄鱖鯉是兩種鱖肉之色白鯉肉

之色黃光緒志刊於鱖下又三十一頁鮒後嘉慶志

有土附養魚經土附魚似黑鯉而短小附土而行不

似他魚浮水故名京口錄首大而身小謂之

鮒光緒志無此條而增杜父亦引京口錄二語殆是

一物歟又三十三頁膾殘魚嘉慶志作王餘魚舊志

公渡頭小者寸餘俗名銀魚大者盈尺俗名鮓魚出石

亦曰麵條魚又後有多暴為脯及作鮓晶瑩可愛光

緒志刪殆辨其與銀魚異也又四十一頁赤卒卒當

作弁赤弁即蜻蜒名也又四十八頁陸師農云師農

丹徒縣志摭餘

卷二十 校勘記

美

當作農師按宋陸佃字農師放翁之祖著稗雅

卷二十一職官表

十二頁 縣令姚元特下嘉慶志多

列七人名又田文虎譌田虎文又七頁第 蔡封後嘉

慶志有郭占選並蔡封復任二名又二十二頁教諭

胡正家後有華謙一名光緒志漏均補刻續輯職官

表後又名宦二十八頁揭帖徧子都城子當作於

卷二十二科目

三十頁 永樂丁酉科楊琪府志琪作琪

又庚子科榜 當作繆讓又癸卯科錢浩 當作王政

又宣德丙午科榜 當作周讓又三十頁成化乙酉科

金簡 當作陸簡又三十頁癸卯科儲 當作瓊又三十

三頁嘉靖甲午科鄭維 城當作誠又三十頁癸卯科尤

當作沈紹慶又乙卯科張士士當作世府志同又戊

午科中榜余毅當作余又辛酉科許國誠榜當作許國無誠

字又三十頁萬五頁歷辛卯科汪鳴鸞榜當作鑾又三十頁丁酉

科呂克呂榜當作吳三十頁順治甲午丁酉庚子科張玉

裁均中三次副榜光緒志漏續輯已補又三十頁康熙

辛酉科胡仁仁榜當作任府志及前卷進士甲戌科均

同又四十頁丁卯科張兆兆榜當作學又壬午科北榜劉

直舉光緒志漏續輯已補又甲午科方炳當作方文

炳又雍正癸卯恩科王晉原榜當作元又四十頁壬子

科鄭長鄭榜當作郭又乙卯科吳鎮充榜當作充四十頁乾

隆恩科寶晉志有楊允棻在沈沉下四十頁甲午科

丹徒縣志據餘 卷二十一 校勘記 七

寶晉志有胡公位在江允謙下北榜有張汝諧四十頁

丙午科寶晉志有顏允燦在戴三錫前戊申恩科

順天副榜胡培寶晉志作正榜四十頁壬子科陳洪貢

舉考略洪作宏四十頁嘉慶丁卯科毛松當作程應佐

五十頁戊辰恩科有朱宗海在張啟圖下癸酉科沈

階階當作皆一五十頁戊寅恩科寶晉志有殷煨在俞

逢辰下五十頁同治甲子科李宗元溧水學溧誤溧

卷二十五名賢 七晉祖述傳元帝逆用為徐州刺史

句逆當作遂又齊王同建義趙王倫收同弟北海

王寶及前黃門郎宏農董祚弟艾與同俱起句三同

字俱當作罔字按齊王罔晉又二十頁蔣寅傳丁酉

遷刑部主事轉郎中壬寅出守廣平府丙午擢福建
巡海道戊申丁內外艱辛亥補浙江糧道乙丑陞雲
南按察使司丁卯陞貴州布政使司見開沙志正志俱漏
載年分

卷三十一 孝友

十四頁

高燦傳燦當作耀原名勳

見高氏家

乘又二十頁

陳宗璜傳璜當作煌

見陳氏家乘

卷三十三 文苑

四十八頁

法重正傳子嘉蓀先卒按嘉蓀

飯珠軒遺稿有子芝瑞跋云大父卒時先君始七齡
先君卒時予始十齡據此則云先卒者誤也飯珠軒

集道光癸未梓行

三十五頁

嘉蓀傳亦漏載又鮑之鍾

傳有策竟遺才叔句才當作方按李方叔詳宋史

丹徒縣志 摭餘

卷二十一

校勘記

亥

四十八頁

馮臥閒傳

軼具名

按馮曙字臥閒

四十九頁嚴保庸

傳唐陶山方伯集句贈之云孺子亦知名下士樂人
爭唱禁中詩句按是韓翃詩非集句

卷三十八 列女才藝

二十七頁

王玳梁字玉燕王文治女

諸生左蘭成之室按玳梁實為夢樓女孫能詩工畫

適揚州汪詣成司馬見論山詩鈔卷十四題註家藏

夢樓手簡亦以詣成好畫玳梁能畫並言嘉慶初名

媛詩集載玳梁倡和之作頗多允宜考明另傳志誤

為夢樓長女與妹桂蟾合傳自應別有其人惟查左

氏家譜壻字蘭城亦非王壻疑竇滋多姑附誌此

卷四十六 書目

二十五頁

閨秀鮑之蕙青娛閣吟稿青當

作清

卷四十七藝文

二十九頁駕幸京口三山賦仰轟捎雲句

捎當作梢

三十頁張冰嬉於顛天之臺句冰當作水

又撫華陽之銘石撫當作撫

卷四十八南朝詩

二頁鮑照行京口至竹里詩題注古竹里

在縣東三十里俗稱苦竹里

按竹里隸金陵方輿紀要城東北三十

里有竹篠鎮

建康志云西至靖安東至石步南連直廣北臨大江指此胡氏曰

卽竹里也晉隆安元年王恭舉兵京口討王國寶等

國寶請於會稽安道子遣兵戍竹里夜遇風雨各散

歸卽此嘉慶志見此詩有京口字便刊入光緒志

又實指其地爲苦竹里皆未詳攷也十頁唐詩邱爲

丹徒縣志摭餘

卷二十一校勘記

堯

登潤州題州字下落城字

二十四頁李涉京口送朱晝

之淮南詩爲傳風水渡江南句南當作難

見御定全唐詩此

誤作南字出韻

卷四十九宋詩

四十八頁柴望多景樓詩今人偏動黍禾

愁禾當作離又烟霞瀕洞翻蘋末句霞當作沙

卷五十明詩

十二頁馮子振登金玉岩詩山壓蓬萊第

一峯句峯當作宮

卷五十一國朝詩

首冷士嶠海天別詩豈料前車先

失利車當作軍

四頁梁佩蘭次京口詩潮聲吐大用

句用當作川

六頁張九徵九日招隱寺詩採朮蒸梨

共一卮黎當作藜

四十四頁張景蔚金山雜詠詩山鳥

不疑人句山當作江又下一句少刻一字 四十朱

祐登潤州城樓詩千山夕照依山盡句山字當作巖

五十頁程兆熊哭鮑海門詩一代傾遺風傾當作仰

六十頁張學林九日江干小集詩第七句羸當作羸

五十頁鮑皋宿焦山詩靜處疑山動句處當作極

九十頁鮑皋五州山因勝寺詩林虎時來白晝眠畫當

作畫 六十頁法重正丁卯橋詩註 韋秋出墓 出當作山

卷五十二國朝詩 五頁鮑之鍾石公山樓秋望詩與本

卷六十六頁兩見重複 七頁阮元剗股祠題祠當作

詞 九頁賀寬鶴林寺重修陸丞相祠堂詩註潤州詩

鈔序曰句序當作註 十六頁齊彥槐唐石佛入焦山

丹徒縣志據餘 卷二十一 校勘記 全

歌詩今年我入揚州闌句闌當作闌 十九頁解懷鶴

林懷古詩與七十一頁兩見重複 二十頁楊鑄層樓

火詩銀河瀉火浴火龍句火當作水 三十頁繆鑣為

于子道作第一村圖詩二首與七十八頁兩見重複

四十頁虞攀桂補糧州雪天打虎歌州當作洲 十五

六十頁楊晉泰聞官軍收鎮江喜而作歌詩註 余軍門步

當作萬 六十頁釋清恆宿綠蓋樓詩雲藏半鶴水聲

中鶴當作壑 六十頁張山何將軍圖題圖當作園

七十頁鮑文達題楊時庵前溪訪友圖詩登堂相揖不

相識揖當作揖 又林則徐生公石上圖為楊子堅

題石上二字下落論詩二字 又陳用光題楊子堅

生公石上論詩圖詩我意論詩友句意當作憶

十七

頁七殷綬禹王廟詩四載功臣後句臣當作成

卷五十三詩餘

首蘇軾水調歌頭

後嘉慶志有張先南徐

中秋南鄉子

一闕光緒志漏是輯補刊

四辛棄疾京

口北固亭懷古

永遇樂

後嘉慶志有劉過京口賦與歌

者侑尊

門調金

一闕光緒志漏

七陳亮登多景樓念奴

嬌

後嘉慶志有史達祖京口寄所思

玲瓏四犯

一闕光緒

志漏載

九

王皋嘉慶志作王臬又有八月十四夜

北固望揚州

唐多令

一闕光緒志漏載

十一

朱彝尊

金山寺

滿江紅

後嘉慶志有程康莊招隱野菊

如夢令

一闕光緒志漏載

十四

陳維崧金山觀競渡

賀新郎

丹徒縣志據餘

卷二十一校勘記

全

嘉慶志有查慎行重渡揚子江

釵頭鳳

一闕光緒志漏

十六

周珂京口阻風一枝花

後嘉慶志有湯寅潤城

泛舟

惜餘春慢

一闕光緒志漏

十七

賀寬焦山和前後

嘉慶志有杭世駿鶴林寺米襄陽祠

兒一半

一闕光緒

志漏

卷五十五明史

七

李東陽京口靳氏祠堂記

六落於

丁卯之春落下脫成字

嘉慶志亦脫

四十

劉觀文張氏

賑饑記

三行

蠲本年本折色錢若干按張氏家乘錢字

下落糧字年字下無本字

卷五十六國朝文

十一

宋元豫宗忠簡公墓重建享

堂記

後嘉慶志有魏禧游京口南山詩序光緒志漏

卷五十七史事

四頁黃鉞常熟人丁父憂方孝儒弔

之句儒當作孺

卷五十九紀聞

四頁第二十一行詩話云云內有王介甫與

宋楊蟠句當列入宋代不當列入唐代且詩話甚多

又不詳著者何人不免疎漏

六頁潤州得玉磬十二

以獻張率云云攷率是梁武帝時人見南史何得列

入唐代均誤

十二頁李德裕北固懷古詩一段後嘉

慶志有張祐客於丹徒一段

雲溪友議又丹陽軍十三字

新唐書

又潤州至丹陽郡一段

新唐書地理志光緒志均移入

史事

十五頁柳開自常徙潤一段下嘉慶志有乾貞

二年封東海為廣德王一段

南唐書又李建勳女一段

丹徒縣志摭餘

卷二十一 校勘記

全

南唐書

光緒志移入史事

十六頁十一行半月前都城錢邦

甯句都當作郡

二十頁韓蘄王至鎮江一日抵晚令

帳前提轄王權往金山戒不得用船渡給浮環偕一

卒至西津云云按遜齋閒覽曰壺乃今所謂浮環者

凡渡江海必預備浮環以虞風濤覆溺之患其形如

環而空中用帛為帶挂之項上出兩手以按之則浮

而不溺可以待救至今浙人呼為壺

又按鷓冠子

學問篇中流失船一壺千金

第二十一頁命破鑄給

之日官軍張頤待哺日當作曰

二十九頁韓蘄王

之夫人註周氏蘄國夫人蘄當作蘄

卷六十紀聞

二頁南京都御史邱閻一段後嘉慶志有

萊州王貫同知鎮江廉儉博學同僚皆師事之一條

光緒志移在十一頁鎮江從無殿元一段下

十六頁

楊文襄在金山有角巾人訪之一段下嘉慶志有喬

宇幼從父京師學於楊一清一段光緒志移入史事

二十頁

朱之蕃未第時一段下嘉慶志有嘉靖中江

洋有警設兵官於鎮江一段並楊慎嘗奉使過鎮江

謁楊一清一段光緒志均移入史事

十七頁

靳文僖

康陵舊學南巡時臨其喪一段有代言歎息歛手句

言字下落者字

二十頁

陸右丞蹈海錄一條四方鳳

鼇背舟中國龍湖水底天湖當作髯

二十頁

金山郭

墓下一段後嘉慶志有魏楚白云潘江如四壁蕭然

丹徒縣志據餘

卷二十一

校勘記

全

而北海之座恆滿其論詩慷慨謂鍾譚興而國亡是

亦法家定案

靜志居詩話

光緒志漏

三十一頁

經營門

外驛舍按經營門當作金銀門即西門也見卷三第

二十四頁鎮海將軍王鈇重修郡城記

三十一頁

陳春海恩澤陳當作程

四十頁

鮑某揚州人一條按

定遠方運司

裕頤

二知軒文集載其事作包姓

補

卷四十五方外

第八頁夾山惟俊禪師又第十四

頁夾山曉純禪師此二傳均應刪

按宋嘉定元至順兩郡志均無夾山

名自明季崇禎林皋創竹林寺吾邑始有此名而嘉慶邑志初載之又按傳燈錄載夾山出住鶴林又道

吾到鎮江鶴林指夾山見船子又棲遲豐州卜居于

夾山蓋夾山本善會禪師字後居豐州是豐州先有

夾山吾邑夾山則自明季始惟後曉純均宋時禪師

並不應載其傳正志據五燈會元錄之殊未深考

卷首圖 第三頁 馬家甸馬當作繆

卷六寺觀 第六頁 鶴林寺晉太興四年創又卷四

多虎刺史王恭聞安有戒德延入山為說法授戒恭

因建寺奉安像考大興元帝年號義熙安帝年號相

去百年就誅義熙則隆安後年號又考高僧神僧二傳

法安伏虎新 又寺觀第七頁寺建自法安大師 考

陽無至潤事 又寺觀第七頁寺建自法安大師 考

嘉定元至順兩郡志均無夾山名晉時尚無此山

寺於何建又考高僧神僧二傳安無至潤州事誤

卷十碑碣 第四頁五行僧法永書黑漆光贊下注

五方外第十五頁黑漆光傳載至元間來鎮按至元

元世祖年號紹興宋高宗年號據此紹興誤又考鶴

林寺碑碣 贊當作傳

跋

編修志乘官家事也然宋洪皓譔松漠紀聞元王鶚譔汝南遺事近金陵陳作霖亦輯有金陵通紀通傳此皆私家著述固足與正志參考者吾邑志創自明正德間崇禎甲戌稍增益之有清時凡三修而終於光緒己卯是役也先君子參預其事願自丁粵亂鄉人多流寓四方未能周訪及竣後續有聞知先君子以關江鄉文獻不忍棄若弁髦謹藏篋衍擬輯爲邑乘摭餘不幸賈志厭世昔班孟堅修前漢書未成曹大家續之彼以女弟克成兄志成十三朝之良史而丙榮不能竟先君子未竟之志成一邑志乘之緒餘則不肖莫大焉爰

丹徒縣志摭餘

跋

一

啟敝麓幸獲完存惟學殖荒落多賴諸前輩及同學贊襄紉禎集思廣益聿成先君子之願永感不忘故人物一門頗有爲先君子故後增入者因擴之爲書二十卷第表微闡幽以後進輕操其柄誠多未當深望大雅名公有以教之更望後之修邑乘者錄其瑜而棄其瑕焉是輯三易寒暑六易稟本至戊午孟冬刻竣丙榮

謹跋

